

近代中國史料叢刊續編第二十輯
沈雲龍主編

思補齋筆記

恩世潘著

文海出版社

有限公司
印行

思補齋筆記序

予德薄能鮮遭時竊位渥受

三朝知遇登揆席直樞垣者逾十稔惴惴焉有力少任重之虞憶本貫歛而遷於吳承先世積累百餘載誦清芬稟庭訓奉師資誨育於未遇陶冶乎旣仕補過之餘曷敢忘所自來耶通籍旣早屢忝校文之役足跡幾半天下咨於故實尙有典型國史野乘信而有徵者次及之顏曰思補齋筆記都爲八卷凡所見異辭所聞異辭

41/5235/14

所傳聞異辭者概不孱入從其慎也始自 廷對泊於

樞直

先聖

後聖

訓謨敷錫報豈涓埃

寵迺今昔進思退思夙夜兢惕紀榮遇第一溯歛溯吳
仁聲累葉躬厚留餘堂構簪笏潛德弗曜義方克廣誦
芬錫類爰逮親黨紀述德第二

聖以孝治

詔許陳情十年至樂萬鍾弗榮近遊撰杖絜養補筮我
思古人詠東先生紀循陔第三誨我成我經師人師或
隱或顯或淑於私雨化風播如春之時感舊歎逝以輔
歌詩紀思源第四槐廳清祕厥有成書館閣之掌文獻
所備與居與稽耳食之餘後有續者徵以起予紀掌故
第五菁莪育材

授之文枋五十餘年疊膺

寵命無役不從執事惟敬宅俊培英於斯爲盛紀文衡
第六鉛槧所資學同四寸匪志齊諸亦資餘論數測往
來理歸懲勸類而誌之無取蕪蔓紀管聞第七觥觥我
朝大臣儀刑節以壹惠諡以尊名循之責之實大於聲
文表範則先正是程紀易名第八

思補齋筆記卷一

吳縣 潘世恩 芝軒

榮遇

乾隆癸丑四月

御製還宮閱卷詩云傳臚返禁城
渥雨喜新晴
曬潤麥
麩協高低禾黍生
憑觀真滿志
自問益惶情
細閱十魁
卷都知予戒盈
詩註云向例殿試前一日由讀卷官擬
題八條請旨示定四條然後撰策問今年第四問保泰

持盈非讀卷官原擬乃予特命發問者今日呈進前斗
名卷詳加披閱尙知發揮此義此子夙夜單心宥密而
多士草茅新進竟能共喻朕懷此中庸九經之所以貴
誠也臣世恩謹跋云世恩江左庸材壬子膺鄉薦癸丑
聯捷殿試卷進

呈

欽定一甲一名進士授職修撰自慙薄植曷稱大科伏
讀

制策以保泰持盈諄諄下問敬維

聖主單心宥密夙夜兢兢草茅下士何能仰窺萬一顧
嘗憶宋臣程頤易傳云德善日積則福祿日臻德踰於
祿則雖盛而非滿竊本此意以對揚豈有芻蕘之一得
迺

聖懷沖挹不遺土壤細流虔誦

宸章實深感愧

御製筆誤識過文云昨朝考之題於三月卽擬定親書

封識清晨連封發交監試王大臣以試諸士可謂謹密
之極矣乃今日閱卷諸臣定等呈覽視之其疏題則積
古也不見於經文乃憬然而悟曰本擬稽古而予筆誤
稽爲積監試諸臣見不及此而未請旨是諸士子之誤
皆予一人之誤也夫試題一字之誤亦何關要然使政
之是非人之生死亦如此誤書可乎且予誤而無人敢
言則諸事叢脞其弊將不可勝言矣書以自責用戒後
此硃筆之慎也予更思之稽古固出於典謨但稽者考

也稽在人而古在古猶有彼此之分焉至積則聚也稽
而聚古於心施於言行播爲政治而非徒資博雅之爲
不亦宜乎諸士子並未言及此是以申而論之然總類
飾非文過之辭益重吾過而已耳五月初四日軍機大
臣阿桂等

奏遵

旨恭繕

御製筆誤識過文交新進士閱看據潘世恩等僉稱我

皇上熙績釐工惠疇亮采合洪纖而無間實中外所
聞凡繫乎民生闕乎政治豈有毫髮未致其精詳者
協中旣審於萬幾而識過並嚴於一字蓋

慎之又慎彌昭翼翼之小心雖微乎其微亦寓煌煌
大誠況稽於古訓何如積於厥躬

闡義入神竭臣等愚蒙而莫能索解因文見道經

聖人指示而頓覺貫通臣等雜誦迴環曷勝欽服慚

之至等語謹

奏

嘉慶三年二月

御試翰詹

恩

名列一等第二蒙

恩補授翰林院侍讀十月升左庶子四年正月

仁宗親政以講學缺遲至半年未進

特命吏部具本請簡是月蒙

恩升侍講學士四月轉讀學五月升少詹六月升詹事

八月奉

命提督雲南學政九月升內閣學士兼禮部侍郎兩年
之間由修撰

擢至閣學

聖恩高厚感悚難名五年正月抵任雲南具摺恭謝奉
硃批少年得晉崇階又係鼎甲宜愛惜聲名切勿恣志
前程遠大莫貪小利秉此寸忱以匡朝政勉之慎之跪
誦之下彌深欽感自後疊膺

寵命屢掌文衡奉以周旋幸免隕越者皆

聖人之教也

嘉慶丙子九月服闋後陳情侍養仰蒙

恩准已卯十月恭遇

萬壽六旬進京叩祝

召對時垂詢

臣

父年歲飲食一一回奏並陳

臣

父感激

下情代進貢品二九蒙

賞收九件並

賞

臣

父如意一柄天青八絲緞褂料一件寶藍八絲緞

袍料一件米色春綢一匹月白紡綢一匹銅手鑪一對
大荷包一對小荷包四個世恩祇領恭齋回家臣父率
兒孫輩道旁跪接望

闕叩謝

天恩一時里黨傳爲盛事

道光十一年十一月十五日蒙

恩賜紫禁城騎馬同

賜者汪巽泉少司農守和史望之少宗伯致儼皆王子

同年紀

恩詩云鷺序初聽玉漏傳早朝並拜

寵綸宣感深芻秣銜

恩重望切雲霄得路先伏櫪祇應充下乘聯鑣難得盡
同年回思足蘭衝寒日益矢心銘夙夜堅

乾隆十三年始定內閣大學士缺滿洲漢各二員協辦
大學士或一員或二員漢大學士不由協辦得者惟韓
城王文端富陽董文恭二人道光十三年世恩以吏部

尙書授大學士管理戶部是時阮芸臺先生已得協揆

世恩
越次

超擢並承

諭旨褒獎謹成七律二首以志感悚又凡

賞加官銜由太子少保遞晉十七年元旦蒙

特恩加太子太保銜皆殊遇也

舊例初入樞廷者學習行走一二年後奉

旨實授亦有行走年久未經實授者道光十四年正月

二十一日蒙

恩在軍機大臣上行走此

特恩也又 內廷諸大臣

賜城內官房者往往而有近年以來軍機大臣如王文
端董文恭劉文恪戴文端曹文正盧文肅王文恪諸公
從未有

賞給圓明園官房者世恩入直樞廷次日卽蒙

賜居海澱娘娘廟官房一所亦異數也

十八年十二月二十一日

世恩

七十誕辰蒙

恩賜壽先期

欽差署武備院卿英誠捧到

賞件

御筆熙載延祺扁弼亮宣猷襄密勿靖共介福錫康彊
楹帖福壽字各一方梵銅無量壽佛一尊紫檀嵌玉如
意一柄黃碧玳瑁朝珠一盤玉螭銅陳設十件緙絲蟒
袍面二件大卷八絲緞十匹小卷江綢十件小卷線縐

八件春綢八件庭中預設氈桌香案至大門跪接

欽使鼓樂宮燈前導隨入立案前

欽使手遞

御賜如意朝珠向上行三跪九叩禮畢延

欽使入座樂筵款宴酒半勞贈儀物

欽使起如前導送於門外次日遞摺謝

恩先

召見免冠謝出復偕同僚入備蒙

獎諭

手白玉管花翎以賜

世恩

復免冠謝敬奉以出次日補

遞謝摺蒲柳衰年涓埃無補仰荷

榮施逾格

錫賚便蕃真夢想所不到也

二十三年二月十五日內閣奉

上諭大學士潘世恩年逾七十旬嗣後朕御門辦事著加恩免其入班其該管衙門應行帶領引見之日亦著免

其帶領以示體恤耆臣至意欽此

世恩

謝摺有二云以馬

齒之漸增沐

鴻慈之曲體

聽政則趨班特免覲

光而引對毋庸三命益恭敢忘循牆之訓七十日老更

榮納陸之

施感真沁以心脾

恩直周於踵頂

二十三年八月二十六日奉

上諭大學士潘世恩年逾七旬襄贊綸扉精神強固十年以來夙夜趨公宣勤佐治朕心嘉悅之至允宜特沛殊恩以節勞勩著加恩在紫禁城內乘轎用示朕優禮耆臣至意欽此謹查道光十四年元旦奉

旨長齡曹振鏞富俊在紫禁城內乘坐車轎時文襄年七十七文正八十文誠八十六或勤宣中外懋著宏勲或久直樞廷年臻大耋固宜特邀

渥眷並荷

隆施今

世恩

自愧菲材毫無獻納年僅七十有五不逮

三公迺蒙

慈懷曲體

異寵優頒感激惶悚謹紀以詩云

紫禁森嚴漏未闌趨朝特荷

聖恩寬榮叨策騎心猶壯

詔許乘軒體卽安

上界星辰真覺近五更風雪不知寒卻慙半載承

三錫

異數頻仍報稱難

二十五年十二月十四日卯刻

召見至 養心殿上階失足傷脣齒蒙

恩賞假不拘時日並

命軍機大臣派章京二員連日至寓察看情形復

奏又

命進班大臣副憲和淳閣學載增兩次看視當卽繕摺
恭謝旋於二十六日請

安銷假先期

上命總管內監傳知 南書房太監於世恩入朝時著

一人扶掖當於

召見時叩首謝

恩伏查前史齊武陵昭王轉侍中護軍將軍給扶者二
人見南齊書唐韓宏拜司徒兼中書令進見上殿拜跪

給扶見韓愈所著碑文宋王武恭公德用爲同羣牧置
制使給扶者以子若孫一人見歐陽修所著碑文皆曠
與也世恩以菲材暮景仰荷

殊施不勝感悚謹紀以詩云待漏晨趨拾級時覲

光咫尺敢倭遲人誇腰腳年來健自覺精神老漸衰

特遣朝臣頻問訊親承

天語許扶持從今跬步期加慎勉效馳驅報

聖慈

二十六年三月初八日

啟鑾

命世恩至南海子接

駕隨扈當於十五日至新衙門跪

安

召見時奉

恩旨賞穿黃馬褂懇辭不允當卽泥首謝

恩恭查

本朝文職漢大臣

特恩賞穿黃馬褂自乾隆四十一年大學士于敏中始
繼此則五十一年陝甘總督畢沅嘉慶七年直隸總督
顏檢十三年直隸總督溫承惠二十三年直隸總督方
受疇皆蒙

恩特賞顧或以軍功告歲或因畿輔宣勤世恩一介庸
愚毫無報稱荷

鴻施之逾格凜鷓翼以滋慚感愧之餘益增悚惕敬賦

一章以志非常遭際云

南苑春蒐舊典循依

光幸傍

屬車塵纔趨

帳殿星辰近得奉

恩言雨露新章服榮叨慙未稱

絲綸寵錫荷重申撫躬詎有涓埃報惟矢葵忱答

紫宸

乙巳正月初二日

諭嗣後

坤寧宮吃肉

臣世恩

毋庸入坐仍

賞胙肉一盤

文廟春秋丁祭向例開大學士一人至國子監行禮

道光壬寅奉

旨嗣後大學士尙書一體開列請派

丙午二月

諭嗣後每逢經筵

臣世恩

於謝講行禮後卽散毋庸至

文淵閣

丙午閏五月初二日子會瑩奉

命爲雲南正考官次日率領

臣子

泥首

宮門叩謝

天恩謹紀七律二章云

右文

天子重文衡

丹筆從容注姓名三百人中邀

特簡八千里外問前程鑑形肯任魚龍混稱物須持雀
燕平原隰皇華懷靡及捫心常矢玉壺清由來奉使利
西南楚水黔山驛路諳此日掄才榮捧節當年視學記
停驂三迤舊識人文萃六詔新承

聖澤覃豈爲門庭盛桃李要從邊徼得榷枌乾隆丙午
世父典試貴州戊申仲父典試湖南嘉慶己未予視學
雲南此行皆驛路舊經之地故並及之以志

三朝榮遇云

戊申正月初二日奉

恩旨大學士潘世恩著加恩晉加太傅銜並賞用紫韉
懇辭不允當卽叩首謝

恩謹紀以詩云迎年六出早占豐獻歲祥雲耀碧空
天以庥徵昭

聖德

帝敷閭澤逮臣工拜

恩春殿三元會數典香山九老同

同日被
恩者九人

何幸幹材

磨

懋賞矢將精白勵丹衷自愧衰庸蒲柳姿每邀曲體荷
恩私得臻耄耄皆

君賜豈有涓埃答

聖慈

寵晉上公慚變理輝分下乘勉驅馳願廣天保升恒頌
仰和

虞廷喜起詩恭查

本朝滿漢大學士 贈太傅者八人馬齊謝陞張英朱
軾劉統勳蔡新董誥朱珪 加太傅者鄂爾泰范文程
金之俊曹振鏞阮元暨臣世恩而六

戊申十二月二十一日世恩八十誕辰蒙

恩賜壽先期

欽差署奉宸苑卿興保捧到

賞件

御筆三朝耆碩扁望重三公資變理祥開八艷衍期頤

楹帖壽字一幅玉佛一龕佛像一軸紫檀鑲玉如意一柄珊瑚頂花翎貂帽一頂皮蟒袍補服一襲松石朝珠一盤玉瓷銅陳設十二件大卷江綢十疋小卷八絲緞十件小卷江綢十件小卷線縐十件同日奉

上諭大學士潘世恩由乾隆年間供職詞垣嘉慶年間游擢尙書經朕簡任大學士軍機大臣充上書房總師傅襄贊綸扉宣勤日懋現在年登八秩精神強固朕心嘉悅實深允宜特沛恩施以昭優眷伊孫潘祖蔭著加

恩賞給舉人准其一體會試用示朕篤祐耆臣有加無

已之至意欽此

世恩

備員

禁近未補涓埃茲以八十生辰仰荷

九重錫賚

鴻施逾格方切慙惶復蒙

溫旨榮褒

賞延再世信

生成之獨厚非夢想所敢期謹賦七律八章以志榮幸

云

帝許延祺紀七旬

世恩七十生辰蒙賞熙載延祺
扁彌亮宣猷襄密勿靖共介福錫康

疆楹

十年今又拜

温綸衰遲已迫桑榆景

長養還滋

雨露春獻歲迎祥

恩載渥

本年元旦蒙

太傅賞用紫韁

自

天錫嘏

命重申門閭忽訝星雲燦

丹詔輝煌下

紫宸休沐親承

天語溫

奉

面諭二十日
二十二日毋庸進內

先期星使早臨門

璇題拜捧

龍章煥

寶墨欽瞻

鳳藻鸞斐几敷陳增璀璨

尚方瑰異

錫便蕃卽看被體衣裘稱安煥胥叨

大造恩異數榮膺

懋賞延孫枝特荷

寵恩偏鹿鳴遽預興賢列蛾術方慙射策年儘有功名
磨鐵硯莫忘世業守青氈從茲魯鈍宜加勛詩詠周行
益勉旃銅龍曉闕問

安回

唐人

詩句新成荷

聖裁正喜

恩光天上至又看麗藻日邊來
摛詞具仰摛謙吉應教
慙非大雅才侍學頻年蒙

獎勵頽齡何幸得追陪
記從通籍到達瀛五十年來歲
序更八表光陰眞迅速

三朝知遇總

生成和羹敢擬王曾詠

乾隆癸丑蒙
恩授職修撰

絜膳欣陳李

密情

嘉慶丙子
恩准在籍侍養

卷之三十一

三

綸閣超遷思日贊道光癸巳由吏部尙書蒙恩超遷大學士甲午入直樞廷捫心

何以答

昇平年來稷壘

主恩優擢質頻邀

體恤周

寵昇安輿榮策馬道光癸卯賞紫禁城乘掖從

中禁勝扶鳩乙巳冬日命南書康莊敢說馳驅瘁

近年房太監於進宮時春巡

恩免隨扈

大典時虞隕越羞

帶領

御門免入班各衙門引

見免經筵

謝講後毋庸如此

矜全真破格此生萬一豈能酬芸窗世業本青箱科第

蟬聯被

寵光東閣簪毫輝棖萼

子會沂曾綬先後直內閣曾綬以纂修玉牒賞加

侍讀西清接武晉芝坊

世思嘉慶戊午大考一等由修撰游升庶子曾瑩道光丁未大

考一等由編

碧雞舊壤榮持節

世思嘉慶己未視學雲南曾瑩道光丙午簡

放雲南仙蝶新篇紀奉常

會瑋丙午補太常寺博士

小草幸承

膏澤渥全家同祝

壽無疆

虞廷熙績懍承宣黃髮深慙膂力愆馬齒徒增羞戀棧

鴻慈未報忍歸田同朝屈指無前輩

翰林前輩在籍者惟阮芸臺太傅一

人共事和衷仗衆賢惟矢靖共期匪懈慎持晚節一心

堅

思補齋筆記卷二

吳縣 潘世恩 芝軒

述德

予先世畢公高之子季孫食采於潘爲得姓之始隋以前世系莫考始祖良輔公諱名閩之三山人唐僖宗光啟二年爲歙州刺史有惠政去之日父老遮道攀轅遂家於歙

六世祖谷馨公性友愛父沒時甫四齡兩弟在襁褓長

而教養之至成人由歛遷吳侗儻好義貌恂恂儒雅力
能舉三百斤嘗因納課至杭挾貲數千金盜入舟勢洵
洵公怡然曰貲具在任自取之盜喜繫舟於旁分番傳
遞會其黨互爭盜舉頭檻外若有指揮公自後持其足
逆而投諸河盜躍而起舟人以鐵貓擊之斃黨懼棄舟
遁人咸服義勇焉

五世祖其蔚公杭庠生候補主事勇於爲善恤族救災
助婚嫁喪葬貧不能償責者焚其券修道路橋梁歛邑

志載之遇歲饑於家祠前開池日役數百人食之而厚
其值全活甚衆乾隆甲寅予謁宗祠至祖墓祭掃道旁
觀者雖五尺童子亦指謂人曰此其蔚公子孫也蓋公
之遺澤長矣

公將之天竺進香中途遇婦哭甚哀詢之其夫以官逋
拘獄將自鬻以償問所需曰三百金遂罄篋與之明年
復至天竺前夕寺僧夢神謂曰有自新安來者盛德士
也其後當累葉榮華宜厚待之及明公適至僧以夢告

方禮拜時風吹殿前綵繪盤空中公默禱如有後福當
墮予前旣而繞公身良久見者皆以爲異此事乾隆癸
丑程蘭翹學士昌期在澄懷園告邱芷房姨丈庭澂予
始得知之

公嘗篝燈讀書有偷兒入室執之乃鄰村某也以窮乏
告予之十金俾謀生理泣謝而去逾年又至訊之曰向
者金已盡矣又予之十金旣而又至則曰小人受公惠
朝夕頗自給所以來者欲報公耳出地券一紙曰葬此

富貴累世我小人也無福當此願以獻却之不可以五十金酬之谷馨公沒後葬其地所謂鳳形者是也

會大父贈光祿閒齋公績學能文屢躋場屋乾隆丙子年六十七猶率領世父榕皋公同應浙闈壬午世父舉浙江鄉試乙酉仲父畏堂公舉江南鄉試己丑世父成進士官內閣中書皆及見爲之色喜享壽八十四著有寸耕草堂文鈔行於世

大父贈光祿貢湖公孝友惇睦人無間言因閒齋公墓

年家道中落遂棄舉業盡心侍養暇則讀經史教子弟以敦行力學娓娓不倦猶記予十一歲時公令諸孫背誦左氏傳如一字無差賜以筆墨箋紙一日予兄弟隨侍以君子食無求飽命作破題予援筆立成日以食觀君子志不在飽也公喜甚加賜圖章及名人書札公嘗言陰德如耳鳴必使他人聞之便是好名故所行善事雖子弟無知之者

先光祿公自乾隆甲申游庠應試南北闈六次屢薦不

售甲辰予兄弟同入泮宮是年仲父畏堂公館選例編
官卷丙午率兩兄及予應江南鄉試父子兄弟矮屋中
儼如家庭聚處人皆豔羨試畢隨侍游雨花臺報恩寺
登燕子磯至金山寺觀東坡所留玉帶由大江放棹而
還亦樂事也

嘉慶己未予奉

命視學雲南先光祿寄諭曰汝蒙

聖主隆遇當盡心校閱遴拔真才近如錢南園尹楚珍

諸公皆卓然傑出勿謂邊徼無人迺南間有瘴氣宋劉
器之處瘴鄉法惟在保身節欲則客感不能侵因手輯
衛生寶鑑一編以賜

甲子六月予奉典試浙江之

命先光祿諭曰兩浙人文淵藪汝膺重任公正固不待
言尤宜矢以虛心吾七試棘闈知勤苦自好負才能之
士固有鐵硯磨穿皓首不得一第者歐陽公求其生而
不得數語雖論治獄衡文者亦當存此心冀無媿耳八

月奉

命視學浙江十月光祿公暨母夫人迎養至署憶自甲寅歲拜辭膝下忽忽十年至是始得團聚使署之西有園中爲再到亭西有定香亭其東補竹樹軒有老梅十數株花時光祿公偕母夫人率子婦孫女輩列席軒中歲以爲常有詩紀事云明聖金闕一水連歡承子舍拜恩偏新馳

鳳詔三千里重認鴻泥四十年世上榮名如汝易天倫

樂事幾人全喜聞蕊榜多英儁報

國由來在得賢幾載清娛泉石間者回飽看浙中山出
門恰似到家樂就養仍如招隱閒園竹未荒猶待補池
荷雖敗不須刪十年知爾天涯夢相見還疑夢裏顏

光祿公自乾隆辛卯秋試後不到武林三十四年至是
湖山勝處時復登臨長夏無事輒於淨慈寺納涼數日
一游西湖艤舟南屏山下緣磴詣壑庵觀摩厓隸書或
從靈隱至理安寺登松顛閣由竹徑上韜光觀香光心

經墨蹟松靄山房觀竹垞手卷或偕門下士秋濤宮觀
潮出艮山門至桃花港山水清游殆無虛日子試事稍
暇輒復追隨極生平樂境也

予視學三載光祿公時諭以培養人材整飭士習正本
清源在自矢清白加以勤慎庶不至有負委任每試竣
一郡必取生童試卷覆閱如位置得宜輒喜形於色一
日試紹興歸先光祿謂曰吾閱府學一第一名文字不
如第三何也亟檢覆卷呈閱始釋然蓋公論文精審雖

名次先後不稍假借如此

吾家小試遊庠自五世祖其蔚公始公於康熙甲辰提
學道李公如桂歲試由商籍入學高祖敷九公於康熙
乙卯提學道祖公澤潛歲試由商籍入學自後遊泮宮
者不可殫述先大父貢湖公支下世父榕臬公乾隆乙
亥雷翠庭先生鉉科試由商籍入學後歸吳縣本籍仲
父畏堂公於庚辰劉文清師歲試入學光祿公於甲申
錢稼軒先生維城科試由商籍入學後歸吳縣本籍子

同堂兄弟三人伯兄理齋於壬寅彭文勤師科試入學
仲兄樹庭與予俱於甲辰謝金圃師歲試入學子會沂
於嘉慶壬申遠臯先生文幹科試入學兄子會彥會琦
於丁丑湯敦甫先生金釗歲試入學兄子遵祁希甫子
會瑩俱於道光丙戌辛筠谷先生從益歲試入學姪孫
仁麀於壬辰汪巽泉先生守和歲試入學仁鼈於癸巳
廖鈺夫侍郎鴻荃科試入學仁鳳於甲辰張小浦閣學
蒂歲試入學姪孫觀保於丁未李栢堂侍郎煌歲試入

學姪孫介繁誠貴於戊申墨卿光祿青麀科試入學里
人稱爲秀才家風云

世父封光祿榕臬公乾隆己丑 殿試第八卷進

呈引

見遲誤降附三甲末 朝考入選

特用內閣中書嘗入直劉文正公指以語人曰此杜老
所云天子呼來不上船者後予登第乞假完姻汪琬雲
同年爲寫秋帆歸興圖同人賦詩以贈世父題七絕五

首中有云天子呼來不上船元臣諧語一時傳錦標奪
得全家喜棖觸前塵廿五年蓋謂此也公於丙午典試
貴州戊申以戶部主事告歸家居四十餘年擅山水文
字之樂嘉慶丙子重遊泮宮道光壬午重赴鹿鳴

賞員外郎銜己丑重宴瓊林

賞加四品卿銜並以年逾八旬

恩免進京仍照例給賞時予兼署禮部尙書親奉

綸音具摺陳謝有云臣伯父重登藥榜百五人之選尙

有一存我

聖朝再宴瓊林二百年以來於斯六見吳下耆英傳爲
盛事理齋兄先於嘉慶戊午侍養在籍得子較遲公親
見兩孫遊庠並得三曾孫享壽九十有一

仲父贈光祿畏堂公乾隆甲辰翰林散館改刑部主事
戊申典試湖南癸丑予偕理齋兄入京會試止宿果子
巷四眼井寓仲父曰此地王夢樓先生得探花吉宅也
汝曹勉之是年予於此設宴歸第乙卯理齋兄亦得探

花時予兄弟隨侍京邸光祿公以書諭曰吾家兩世六人半在京師仲父學有根柢事事可爲師法汝弟兄朝夕稟訓互相砥礪翰林固職在文章要知報

國更大有事業在也嘉慶丙辰公以刑部郎中俸滿卽告歸自兩伯父先後歸田里居咫尺光祿公晨夕過從山水清遊琴尊雅集出入必偕間與郭匏雅范芝巖宋香巖諸先生造幽探勝煙霞杖履時在支硎鄧尉間見者咸謂洛陽耆英不是過也

仲父畏堂公乾隆乙酉江南鄉試中式屢試禮闈不售
甲辰始成進士總裁蔡葛山相國定圍尙書紀曉嵐少
馬胡豫堂少空癸丑夏曉嵐師謂予曰憶甲辰入闈榜
前二日午睡方覺知草榜已定意甚不愜因徧閱各薦
卷見江南好字九號卷五策淹博詳明語有包孕知爲
績學之士是時如病熱發狂得食西瓜灑然而醒因商
諸同事以中卷易之及拆封卽君伯父也以是知君家
先世必有陰德今又得大魁益信食報不虛矣予歸以

告公曰先世陰德要在子孫善承昔人喻以火旺添油
益當加之勉勵予至今猶佩斯語

畏堂公嘗謂予曰人生仕宦得失無常境遇險夷不一
惟取朱子近思錄時加玩味則中有把握不爲事物所
搖動真至論也

予母黃夫人素得外大父母歡心爲予談先世事甚悉
外大父

馳贈榮祿大夫西樵公諱士欽潛修不仕家世戒殺生

鄉里有善人之稱訓諸子以讀書敦行舅氏湧峯公諱
圖新乾隆甲午副榜春巖公諱應超己卯舉人官福建
古田縣曉山公諱國華己酉舉人子誦經時受業師也
湧峯公子表兄一機壬子與予同榜舉人子視學浙江
襄校試事攜西樵公秋江泛月圖屬題予謹賦五古一
首云昔我外王父就養至江右我時甫二齡歸甯侍我
母不及記公容但聞公德厚至今鄉里中稱善不離口
繼從舅氏遊循循能善誘詩禮述舊聞待問應鐘扣想

見過庭時一一口親授
志各殊報施理非偶壁
厥謀再世義方守伯也
中論文把尊酒發篋示
卅載空回首秋月寫八
川歸翁受推公利濟心
以爲壽述德慙蕪詞託

東坡志林卷之二

二

--	--	--	--	--	--	--	--	--

思補齋筆記卷三

吳縣 潘世恩 芝軒

循陔

嘉慶二十一年九月

世恩

陳情乞養摺云竊臣江左庸

材毫無知識荷蒙

皇上參養成全

天高地厚由乾隆癸丑翰林十餘年間疊膺

寵擢洵陟農卿雖捐糜踵頂不足以酬萬一豈敢稍圖

安逸自外

生成惟是臣自幼隨父讀書年二十五卽離膝下供職

春明中間渥荷

殊恩徧歷六曹視學三省二十餘年來服官之日多事

親之日少臣父向因精力尙健曷以奉公盡職不敢援

家無次丁之例遽請歸養茲臣於嘉慶十九年六月丁

母憂回籍本年九月二十日服闋臣父今年七十有二

兩載以來寢興飲食跬步不離臣於定省之下時時體

察覺臣父精神迥不如前臣僅有一兄早經出繼分居

若臣進京供職則遠違膝下晨昏侍奉無人欲迎養至

京則水土異宜舟車亦多勞頓中夜思維徬徨莫措臣

年齒正壯犬馬之報方長而臣父精力漸衰烏鳥之情

更切欽惟我

皇上孝治天下凡臣子難言之隱皆得上達

宸聰臣不揣冒昧仰懇

聖主逾格鴻慈俯准在家侍養則臣父子共戴

堯天之德益欣

化日之長臣父此後年華皆出

恩施再造生生世世頂感

皇仁於無既矣謹瀝情恭摺具

奏伏乞

睿鑒臣無任悚息待

命之至世恩於嘉慶丙子九月服闋竊念光祿公年已

七十有二中年以後憂樂傷懷兼以操持家政綜理瑣

屑竊窺精力迥不如前子曾沂本省中式又將計偕北上曾瑩曾綬年近十齡未諳溫清不得已冒昧陳情未及親自進京咎戾滋重仰荷

天恩降補侍郎准其終養舉家頂戴惶悚難名謹遣人遞摺謝

恩奉

殊批忠孝二字不可歧視知所先後則近道矣跪讀聖訓感激涕零自是膝下承歡八九年間稍盡烏鳥私

情皆出自

聖人之賜也

嘉慶己巳光祿公移居城東鈕家巷有詩云地名鸞駕巷家有鳳池園皮陸昔所憇羊求今與論亭臺詩世界水木道根源善閉無關鍵何知塵市喧園爲顧中丞汧故居今分爲二東爲水園程氏所居予家在其西當日所謂陸園也園之門曰日涉北有庭三楹曰蓬壺小隱上有樓以皮

賜書背植牡丹數百本張幄其上天香襲人庭前左右
有窻有廊有室曰凝香徑曰綠蔭榭曰先得月處曰補
梅軒軒之外有亭下有泉四時不竭曰玉泉其南有屋
如舫顏曰煙波畫船檻外池十弓許游魚瀟潯可樂假
山玲瓏石磴盤折每急雨噴薄其間作瀑布聲四面花
木環繞有古朴參天相傳宋元時物又老梅一株卧地
如蟠龍別幹崛起著花無數餘如蒼松銀杏紫薇丹桂
桃柳之屬錯列如畫池西虬翠居後有芍藥臺花時綠

壁薔薇簇成錦繡再西一椽修竹夾徑題曰峭蒨青蔥
間光祿公於靜攝之暇散步游覽吟嘯自適嘗誦潛魚
躍清波好鳥鳴高枝之句俯仰上下天趣盎然予輒奉
杖以從清晨必呼僮灌溉無虛日嘗曰雖有佳種一溉
者後枯若任其自然必至蕪穢爲學亦猶是矣隨事指
示皆會心不遠也

予年十四五每於夏夜納涼光祿公輒舉古名臣事蹟
反覆講論上下數千年瞭如指掌至是得請侍養諭曰

汝蒙

聖恩高厚益宜補讀有用書爲異日報稱地予因輯讀史鏡古編爲目六十有四每一則脫稿呈上光祿公披覽不倦親爲訂正凡成三十二卷

光祿公嘗誨予曰宋元明諸儒書皆表章聖經窮理之具也宗旨不同各有得力處要不外存天理去人欲而已顧其書太繁則末學不能徧覽語太奧則淺學不能驟明命輯諸儒要語之切於日用者以便朝夕省誦予

因博採宋元明諸儒自周子至李二曲先生四十三家
之言擇其易知簡能近而可思之語彙成正學一編以
呈光祿公一一點定然後梓行

余自出塾後光祿公在舊居之留餘堂親爲督課余與
樹庭兄列坐兩旁或理經書古文或作制義詩賦光祿
公隨時講解評閱庭前桂樹兩株光祿公所手植者數
年後已高出屋角乾隆甲寅樹庭兄捷南闈予寄詩有
幾度秋風慙毳毳桂花香裏讀書聲之句及予得請侍

養已移新居樹庭兄嗣仲父畏堂公後遷居任蔣橋光
祿公日坐映榆書屋觀書予坐西旁讀史遇有疑義請
質一如少時夜則談論古今人物或追述往事昏定後
始就寢至今追溯此境不可復得已

高祖敷九公墓在光福子隨侍歲時祭掃墓前司徒廟
有古柏四株所謂清奇古怪者是也偶值春初鄧尉梅
花盛放光祿公坐籃輿徧遊潭東石壁諸勝迷漫香海
奉杖追隨幾如武陵桃源應接不暇矣

虎阜向多勝蹟吳俗尤嗜嬉遊龍舟競渡燈舫連檣士
女如雲笙歌達旦光祿公性耽清靜非所好也每當風
日佳勝率子姪輩泛舟青山淥水間或遊玉蘭精舍小
坐可中亭生公講臺間至鶴壽山房觀元僧善繼血書
華嚴經或散步山塘花市載菊滿船而歸亦一樂也

每歲春秋佳日光祿公喜作泉石之遊余必從往或登
靈巖琴臺遠眺范石湖所謂下瞰太湖及洞庭兩山滴
翠叢碧如在白銀世界中者是也或遊支硎山厯石室

寒泉中峯放鶴亭諸勝南至天平山遠公亭萬笏林過
寒山別墅千尺雪法螺咒鉢庵小坐宛轉橋止宿白雲
寺間至吾與庵飯罷僧心澄笏輿前導名藍精舍無不
周歷予曾有僧如野鶴喜乘軒之句至今思之清景猶
在目也

道光壬午正月吳中大雪石琢堂先生韞玉招予與吳
棣華觀察廷琛吳藹人學士信中集鶴壽山房爲賞雪
之飲時藹人亦侍養在籍棣華由浙入都適與此會棣

華與子鄉試同年及壬戌入翰林子忝大教習藹人鄉
榜出香東尙書門下故子首倡七律二首有敢向同年
說同館喜從門下見門生之句琢堂亦首倡二律同人
更唱疊和黃羹圃主政丕烈以爲梓鄉盛事彙刻一卷
曰四元倡和詩

戊寅世父榕臬公八十子隨光祿公及同堂兄弟子姪
從孫集賀三松堂壬午秋榕臬公重赴鹿鳴賦紀

恩詩四章光祿公命子依韻敬和云廿年待漏記熏衣

處士星原傍太微北墅會開調鶴徑東山穩卧浣花磯
閒尋碧沼知魚樂嬾向青雲羨鳥飛回首科名六十載
重邀

褒寵下綸闈會持玉尺拜

龍光鎖院親煎第二湯虎榜恰周新甲子鳳池猶覩舊
文章榻來粉署才名重歸到蓬山歲月長海內五人承
異數一時盛事紀軒裳繞舍新添數百竿擷芳亭外露
華寒琴書日永追清賞翰墨緣多結古歡子舍親依腰

脚健孫枝又見弟兄難鹿鳴此日承

恩澤恰憶簪毫侍玉鑾嘯歌久作太平民雁墀詩篇總
後塵史趙算難窮絳亥楊脩碑早識壘辛

三朝雨露沾醲化兩世

恩榮荷大鈞最是九旬宴聞喜鵲班同羨自由身後七
年榕皋公以九旬重宴瓊林子適掌禮部聞喜一聯竟
成先兆矣

甲申光祿公重游泮宮又值八十初度賦述懷四律中

外文章鉅公叅詞絡繹衆體畢備無美不臻光祿公展
玩神怡手自編輯彙成四册三月上旬稱觴豫祝風日
清美管絃雜奏孫曾羅拜四世一庭慈顏歡豫至八月
正日閉門卻賀惟與世父從兄及至戚十數人談讌竟
日而已

光祿公八十初度重游泮宮述懷詩云閒地庵中一瓣

香春風湖畔舊褰裳

予受知學使錢文敏公西
湖閒地庵有公長生位

斗山共

仰韓公峻莊畝真同陸氏荒久已科名付兒輩更來賢

序逐班行宮墻回首渾如昨贏得尊前兩鬢霜錢江一

權路透迤幾度秋風祇鬱伊立雪兼懷交誼厚子與桐門相國

同歲生同受業於吳筠竹師相國歸里後時有書重訂西湖之游搏霄終負祖庭知秋試

屢薦不售戊子辛卯闈作尤為先大父激賞終以不克仰副厚期為恨金臺再上心猶壯

甲午庚子兩應京兆試白下重游志不疲丙午偕大姪兩兒同赴白門秋試差喜

新陰桃李盛江亭不怨著花遲仁和錢君槐與子同案甲子撒棘後以小門生

晉謁一時傳為佳話使節東行駐越州片帆重上武林舟定香亭

有羣賢集謂尤二娛徐雪廬費新橋戚蓉臺諸君竹素園陪學士游梁山舟學

士同遊西湖竹素園放鶴亭贈詩有江左風流推老輩湖西花月紀前游之句
載酒尋山憑嘯傲停琴佇月儘句留自從歸放靈巖權又別西湖十八
秋稠疊

龍章雨露偏陳情

詔下許歸田

子六遇

覃恩

晉封一品丙子秋

俞允悚感難名

榮邀

溫語垂詢切渥荷

殊珍拜捧虔

己卯恩兒進京祝

假屢荷

垂詢

并蒙恩賞如意大緞等九件

恩甫齋筆已

卷三

十

四世一堂看繞膝

曾孫庭誥近已就塾

八旬二老恰隨肩

子少伯兄五歲

春秋佳日履舄追隨人皆豔羨

從今擊壤同歡抃總戴

皇仁錫自天

思補齋筆記卷四

吳縣 潘世恩 芝軒

思源

予壬子癸丑座師長白治亭先生乾隆庚寅舉人主考
武進劉文定公綸長白文恭公觀保壬辰進士總裁劉
文定公長白碩亭先生奉寬鎮洋汪持齋先生廷璵房
考青陽王文僖公懿脩

壬子座師鍾祥李雲門先生乙酉湖北解元主考汪持

齋先生安溪陳瀛可先生科捷辛卯進士總裁劉文定
公長白文恭公武進莊方耕先生存與

癸丑座師諸城劉文清公辛酉舉人主考黃岡萬少槐
先生年茂涪州周緒楚先生煌辛未迴避卷中式二甲
進士

癸丑座師南匯吳白華先生丁丑

南巡召試舉人內閣中書癸未進士總裁金匱秦文恭
公蕙田長白文莊公德保錢塘王文莊公際華

王子房師德州盧海門先生蔭文癸卯舉人主考武進
莊少彭先生承籤涪州周東屏先生興岱己酉進士總
裁韓城王文端公杰治亭師陽湖管松厓先生幹珍
癸丑房師錢塘章文簡公辛卯舉人主考莊方耕先生
長沙劉書臺先生校之王辰進士總裁同治亭師房考
常熟張二聞先生敦均

乾隆癸卯予年十五應童試吳邑侯李昶亭先生逢春
延清江楊桐舫先生懋珩閱卷覆試日桐舫先生令背

誦諸經古文交卷面加批閱尤賞予詩賦諸作以范文
正天下爲任屬對予應聲曰韓昌黎百世之師昶亭先
生命書於卷末以呈閱時庭中丞鶚元中丞嘉之卽命
進見贈以朝珠端硯桐舫先生辛卯進士前長洲令工
書臨米元章得用筆之妙嘗臨恭惟相公以天下之英
任天下之重一則書扇頭以贈至今寶之

甲辰予應府試郡尊胡鑿泉先生世銓河南夏邑人辛
卯進士試題資之深則取之左右逢其原交卷後先生

大加激賞再覆題直哉史魚評予卷云氣度安詳丰神
恬雅昔呂文穆見王沂公詠梅詩以爲此子早安排作
狀元宰相矣吾於作者亦云三覆案出拔置第一總評
云制義代聖賢立言以理明辭達爲主吳下稱人文淵
藪震川慕廬諸先輩卓然以文章名世理勝故也童試
中才華豐贍者正不乏人獨是卷言理明切天然朗潤
較勝他作且其年僅成童而器宇凝重顧視不凡果由
是孜孜不懈於學異時或當以文章追步歸韓亦未可

知掇巍科躋清班特其餘事耳因拔置首選用示鼓勵
潘生勉乎哉倘不善用其才以爲道已在是或且將俯
視一切也其負予期望之意多矣潘生勉乎哉予以少
年薄植遠蒙先生獎許誨諭諄諄旣自媿亦自勉也

嘉善謝金圃先生督學江蘇予甲辰歲試入學乙巳科
試補廩癸丑會試榜後赴圓明園覆試邱芷房姨丈止
宿園寓金圃先生時以上書房師傅亦在澄懷園因
往謁見次日先生公服答拜姨丈訝之曰公門下士何

屈尊若是先生日子
魁也予感舊詩云謝
澄懷一見邀真賞道
子素不工書少時光
無所得辛亥科試胡
相國余感舊詩有自
之句省厓同年見而
公嘗謂今年讀 殿

文恪師之言暗合文端公子讀卷師品業文章爲世宗
仰卽以書論不才豈能仰企萬一而兩公賞鑒如出一
轍彌增感愧矣

癸丑長夏謁冶亭師嘗謂予曰壬子在江南闈中夢有
人贈香楸四枚今已得一元同榜中必有繼起者及嘉
慶己未史望之致儼得會元壬戌吳棣華廷琛得會狀
先生喜曰四元之兆殆謂是與癸酉秋先生爲冢卿子
以司農兼攝吏部嘗有詩云鎖院頻年玉尺掄兩番親

切附龍門藤廳未要雲屏隔半載春風笑語温

雲門師博綜羣書尤精算學著有九章細草圖說雖王
寅旭梅定九無以過之予詩云菘林人望指南車慙愧
梁公藥籠儲海島九章有心得王梅惜未見成書

癸丑榜後偕煦齋同年謁文清師師謂人曰此兩株玉
樹也故庚子春闈贈及門分校諸君詩有我媿師門稱
玉樹散樗也許作荆枅之句先生每爲予作書令從旁
觀得窺其用筆之妙間出所藏名人墨跡見示并貽所

書甚夥嘗謂予曰學者觀書不可欲速先文正公嘗
召見

高宗諭以看書之法看此書如無他書能看一卷者止
及其半既省目力又養心神書亦漸次看到若急欲看
完必生厭倦徒多無益也我輩皆宜奉以爲法予心識
之弗敢忘

白華師戊子大考第一由編修升侍讀官至左都御史
著有白華詩鈔予詩云鷓鴣賦就冠羣仙博物爭誇張

茂先一字推敲詩律細晴窗手訂白雲篇大考題擬張
華鷓鴣賦一時傳誦故云

海門師爲雅雨先生之孫官安徽建平令壬子冬謁師
於官舍值縣試留襄校閱逾年高尙歸里甲子夏予同
師弟文肅公典浙試道出德州謁師於行館優游林下
三十餘年年逾八旬精神強健予寄詩云記從燕寢侍
慈顏珂里重逢使節便琴鶴歸來問松菊八旬爭羨地
行仙

文簡師由中書直樞廷最久以敏練明達受

兩朝知遇爲軍機大臣官至大學士前後屢掌文衡待
門下士誘掖訓誨如親子弟憶壬戌秋扈

蹕至灤陽予每日乘騎前行嘗以縱轡爲樂一日策馬
過青石梁適遇師步行余下馬拱立道旁先生謂予曰
汝上有老親豈可乘危冒險倘有蹉跌若倚閭之望何
予悚然謝自後常乘車遇橋梁必下甲子春扈從至盤
山嘗有詩云一騎星馳逐曉風到來始覺與人同近時

我亦登車慣不敢輕誇策馬雄蓋不忘師訓也先生歸
田後余適在家侍養屢致書屬令奉親至西湖話舊未
果甲申秋先生年八旬遽返道山冬初光祿公亦卽棄
養子壬辰感舊詩云綠野堂開數寄書湖山勝日奉安
輿蹉跎竟負師門約望斷西州恨有餘

殿試讀卷師河間紀文達公爲予題歛硯銘曰稜稜其
骨作作芒取墨則利穎亦傷繫包孝肅豈不剛我思韓
范富歐陽勗勉之意良厚後子爲禮部侍郎先生適掌

禮部故有詩云記從芸館讀新詩又向容臺問舊儀爲
賞硯材新製句富歐韓范想心期

業師蔣實庵先生華元和 恩貢生子年十三燈下偶
作蠟梅花賦先生極爲歎賞因令每月逢五十作詩賦
嘗手書功過一編晝之所爲夜必書之不可書者不敢
爲也道光戊子大吏請入鄉賢祠議上得

旨允准予時適兼攝禮部故有詩云鄉賢忝與容臺議
猶記西窗翦燭年

吳朱庵先生鼎科己卯孝廉曾任蒙城教諭予同堂兄弟三人先後受業嘗日子爲小宋著述甚富晚年手鈔不倦嘗謂予曰汝將來必掌文衡如得學政可將吾所著付梓以公同好及予視學時師早歸道山問所著書則家中久已散佚抱媿滋甚予有詩云說經終日聽吳苞會許才名過宋郊落葉半牀花滿屋暮年手把異書鈔

顧莪庭先生禮琥甲辰進士歸里授徒予於戊申己酉

年從游口講指畫孜孜善誘後官河南司馬就館河督
李公墓府主賓相契極一時觴詠之樂哲嗣穗林子戊
辰典順天試時副榜庚午舉人由史館議敘出宰三晉
頗著循聲予詩云杏苑歸來絳帳春文章信有筆如神
一官老作諸侯客循吏於今有替人

錢塘吳竹堂先生霽壬午舉人癸未進士掌教平江書
院時余肄業平江先生見余歲科試月中桂賦人柳賦
極加賞鑒謂是玉堂中人辛亥壬子嘗以所作詩文就

正深蒙教益詩云問字頻經載酒來成陰猶記手親栽
月中桂樹宮中柳漫詡金門著作才

カニエノ言フ

ノ

思補齋筆記卷五

吳縣 潘世恩 芝軒

掌故

滿洲大學士由翰林出身者徐文定公元夢康熙癸丑
庶吉士雍正元年以工部尙書署理文勤公長白阿克
敦康熙己丑翰林乾隆十三年以刑部尙書協辦尹文
端公繼善雍正癸卯翰林乾隆十三年以戶部尙書協
辦二十九年授文華殿大學士煦齋同年英和乾隆癸

丑翰林道光二年以戶部尙書協辦鶴舫相國穆彰阿
嘉慶乙丑翰林道光十四年以吏部尙書協辦十六年
授武英殿大學士十八年充文華殿大學士

漢大學士

國初以來皆由

特簡嗣由吏部進本惟翰林出身方得開列至如趙國
麟康熙己丑進士乾隆四年授文華殿大學士孫文靖
公士毅乾隆辛巳進士壬辰召試中書五十六年以吏

部尙書協辦五十七年授文淵閣大學士費文恪公淳
乾隆癸未進士嘉慶十年以吏部尙書協辦十二年授
體仁閣大學士章文簡公煦乾隆壬辰進士嘉慶十九
年以吏部尙書協辦二十三年授文淵閣大學士皆異
數也

漢軍由翰林大拜者文敏公百齡乾隆壬辰翰林嘉慶
十八年以兩江總督協辦蔣礪堂先生攸銛乾隆甲辰
翰林道光四年以直隸總督協辦七年授體仁閣大學

士

總管內務府大臣六缺向以大學士尙書侍郎派充間有科甲出身者道光乙巳小山冢宰恩桂孔修大司馬文慶元修少宰福濟靜濤少農柏葭松岑少農花沙納皆翰林出身向所未有也

道光丁酉余與鶴舫省厓兩相國玉庭尙書孔修侍郎同在樞垣煦齋同年以滿漢同堂五人皆翰林爲從來未有予謂五人皆秀才出身尤一時遇合之巧

鄉會試座師投帖稱門生此向例也嗣因避師生嫌改用光名帖惟教習翰林係

特派得用門生帖乾隆四十年程文恭公景伊奉

命教習乙未翰林因生平未掌文衡門無桃李徧致諸同館改用光名自此遂爲定例

每科翰林教習由吏部具本開列掌院學士內閣學士簡派則出自

上裁

國朝滿漢諸臣膺是選者至多不過五六次惟鶴舫相
國自嘉慶己卯至道光辛丑已及八次前此未有也一
日偶同鶴舫談及予謂教習八科固當讓君專美僕以
菲材授書五次逾分滋慙惟一事差彊人意耳因口占
一截句云翰苑由來重館師卅年往事試尋思卽今黃
閣三元老可憶槐廳執卷時蓋鶴舫獻山海帆三相國
館選時予適忝教習今與予同官內閣故戲及之鶴舫
以爲二百年來所未有不可不書竊惟

聖主鴻施儒臣榮遇子曷敢以此自多或可以備

熙朝掌故云爾

恩福堂筆記云故事業師中第出弟子之門榜發後弟
先拜師謂之辭師師隨來謁弟從此稱謂改易矣予謂
師於弟子感知遇之恩固宜致敬弟子於師受教誨之
益豈可便忘自應各盡其道方爲允協余於甲子典試
浙江第三十三名錢巽峙槐與光祿公同案入泮後四
十年出予門年已六十餘矣謁予執弟子禮甚恭予不

敢以師道自居蓋亦各盡其道云爾推之父及伯叔父
同年亦應仿此至兄弟及己之同年則以師生爲重也
乾隆己酉吳江沈庚亭孝廉宗德與子芷堂舍人欽臨
同榜舉人通榜稱孝廉爲年伯舍人稱通榜亦然道光
甲午江南通州孫鼎庵廷元及子蘭檢銘恩同榜蘭檢
聯捷翰林戊戌分校會闈浙江鈕松泉修撰福保出其
門亦甲午同年爲師生甲辰蘭檢爲宮庶鼎庵於是年
成進士出何根雲庶子桂清之門何與蘭檢乙未同年

又同爲庶子以年家子爲房師皆所僅見者因檢恩福堂筆記中有以師生爲同年者故廣及之

鄉會覆試閱卷 殿試 朝考讀卷本科考官向不開列道光乙未奉

旨不必迴避其鄉試覆試本科考官仍不開列子丙申會試正總裁 朝考讀卷庚子正總裁覆試閱卷 殿試讀卷又翰林大考掌院不開列庶常散館掌院教習俱不開列辛丑年庚子庶常散館予與鶴舫相國同派

閱卷則係

硃筆添出者

會試總裁

國初惟順治丁亥用六人餘皆四人爲率亦有用三人者順治己丑多至七人剛林祁充格范文肅公文程洪文襄公承疇甯文毅公完我宋文康公權王文燧康熙己丑二人李文貞公光地張廷樞乾隆己丑二人劉文定公綸定圃尙書文莊公德保道光己丑五人曹文正

公振鏞研農尙書文恭公玉麟朱文定公士彥李宗昉
吳椿朱李吳三公皆文恭壬戌會試所得士尤爲難得
五典禮部試者五人孝感熊文端公賜履康熙癸丑甲
戌丁丑庚辰癸未長白文莊公德保乾隆癸未己丑庚
子辛丑甲辰韓城王文端公杰乾隆乙未戊戌丁未己
酉庚戌歙曹文正公振鏞嘉慶辛未丁丑道光癸未己
丑癸巳長白相國穆彰阿道光癸未壬辰乙未戊戌乙
巳七典鄉試者二人長洲彭芝庭先生啟豐雍正己酉

河南壬子雲南乙卯江西乾隆丙辰山東辛酉江西壬
午浙江乙酉順天南匯吳白華先生省欽乾隆戊子貴
州庚寅廣西辛卯湖北己亥浙江壬子江西甲寅浙江
乙卯浙江

本朝三世爲宰相者長白文恪公尹泰子文端公尹繼
善孫文恪公慶桂父子爲宰相者長白文端公高晉子
文勤公書麟文勤公阿克敦子文成公阿桂文忠公傅
恒子文襄公福長安大學士溫福子文襄公勒保桐城

張文端公英子文和公廷玉常熟蔣文肅公廷錫子文恪公溥無錫嵇文敏公會筠子文恭公璜諸城劉文正公統勳子文清公墉

修撰至大學士者武進呂宮聊城傅以漸長洲徐元文金壇于文襄會稽梁文定韓城王文端大庾戴文端迨余而八至協辦大學士者一人番禺莊有恭

三試皆第一者二人乾隆辛丑長洲錢棨嘉慶庚辰臨桂陳繼昌祖孫會狀康熙丙辰彭定求雍正丁未彭啟

豐祖孫鼎甲雍正甲辰榜眼王安國嘉慶己未探花王
引之父子鼎甲康熙丁未狀元繆彤乙未榜眼繆曰藻
康熙癸巳榜眼任蘭枝乾隆丁巳探花任端書乾隆乙
丑探花汪廷璵辛丑探花汪學金嘉慶辛未狀元蔣立
鏞道光癸巳探花蔣元溥嘉慶己未榜眼蘇兆登道光
丙申探花蘇敬衡兄弟鼎甲順治己亥狀元徐元文康
熙庚戌探花徐乾學癸丑探花徐秉義康熙丙辰狀元
彭定求壬戌探花彭寧求乾隆乙丑榜眼莊存與甲戌

狀元莊培因乾隆癸丑乙卯予與理齋兄聯科得鼎甲亦意外遭逢也

父子同時典試分校者雍正甲辰順天鄉試呂謙恒子耀宗俱充同考己酉嚴民法典廣東試子源燾典貴州試乾隆丙子劉文正典順天試文清典廣西試庚寅劉文定典順天試躍雲典山東試道光己亥何文安典順天試紹基典福建試兄弟同時典試分校者康熙丙午曹鼎望典湖廣試首望典廣西試吳國龍典山東試國

鶴典福建試己未會試沈三會涵同爲分考乙丑會試
王鴻緒總裁兄九齡同考官乾隆庚午莊有恭典江南
試有信典山西試丙子莊存與典浙江試培因典福建
試辛卯劉書臺先生校之典浙江試文恪師典貴州試
癸卯秦泉典河南試潮典陝西試吳俊典雲南試樹萱
典湖南試甲辰又同分校會試己酉馮應榴典山東試
集梧典雲南試壬子吳樹本孝顯同分校順天鄉試甲
寅冷亭師典山東試閩峯師典順天試何元烺道生同

分校順天鄉試道光壬午許乃普典河南試乃濟典廣西試皆盛事也

六代翰林者桐城太傅張文端英康熙丁未翰林子廷瓚己未翰林官少詹事廷玉庚辰翰林官大學士諡文和廷璐戊戌榜眼官禮部侍郎廷瑑雍正癸卯翰林官侍郎降閣學孫若潭乾隆丙辰翰林檢討若靄雍正癸丑翰林

特旨授編修官內閣學士若澄乾隆乙丑翰林官內閣

學士若需丁巳翰林官侍講曾孫曾做辛未翰林官少
詹事元孫元宰嘉慶壬戌翰林編修來孫聰賢辛酉進
士乙丑庶吉士改知縣

四代翰林者靜海勵文恪杜訥初官福建州同以工書
薦直南書房康熙庚戌授編修官侍郎贈尙書子廷
儀庚辰翰林由編修至尙書諡文恭孫宗萬辛丑翰林
由編修至侍郎罷復官光祿卿曾孫守謙乾隆乙丑翰
林官洗馬常熟蔣伊康熙癸丑翰林改御史官提學道

子廷錫癸未庶吉士未散館授編修官至大學士謚文
肅文肅子溥雍正庚戌庶吉士未散館授編修官至大
學士謚文恪漣康熙己丑翰林編修官太僕卿文恪子
櫬乾隆辛丑庶吉士由編修至兵部侍郎無錫秦松齡
順治乙未庶吉士授檢討罷康熙己未

召試鴻博復授檢討官至諭德子道然乙丑庶吉士編
修禮科給事中靖然壬辰庶吉士編修給諫子蕙田乾
隆丙辰探花官至刑部尙書謚文恭文恭子泰鈞乾隆

甲戌翰林編修商邱陳濂乾隆丙戌翰林編修子杲嘉
慶辛酉翰林編修孫焯辛未庶吉士改主事官御史曾
孫壇道光乙未翰林編修長白定圃尙書文莊公德保
偕從兄補亭尙書文恭公觀保同爲乾隆丁巳翰林子
煦齋協揆英和癸丑翰林孫玉庭尙書奎照嘉慶甲戌
翰林芝圃通政奎耀辛未翰林曾孫子受官庶錫祉道
光乙未翰林子受館選子賀煦齋同年兼示玉庭通家
詩云卅載同年結契深手栽桃李已成陰恰欣虬幹千

春健又見龍門百尺森到漑倘資詒厥力謝安終有濟
時心

三朝四世承

恩澤父子孫曾五翰林

晉甯李鶴峯中丞因培乾隆乙丑翰林子翊丁丑翰林
翊嘉慶己未翰林孫浩甲戌翰林濱州杜石樵少宰塢
嘉慶辛酉翰林子芝農尙書受田道光癸未翰林孫繼
園編修翰甲辰翰林雲巢學士翻乙未翰林李杜皆三

代四詞林杜以少宰致仕在京年逾八旬子孫接武清
華游躋通顯可稱盛事

李東雲方伯恩繹正白旗漢軍嘉慶戊辰翰林兄來軒
選部恩綏辛未翰林弟季雲侍御恩慶道光癸巳翰林
兄子小軒編修希彬辛丑翰林孫受之駕部祐庚子翰
林

同胞並登科者昆陵莊絳之子楷康熙癸巳科進士國
子監司業樑庚子科舉人湖北黃梅知縣敦厚雍正甲

辰科進士直隸西甯知縣大椿己酉科舉人四川射洪
知縣柱丁未科進士浙江溫處兵備道楷子秉中康熙
庚子科舉人陝西扶風知縣樛子熊芝乾隆己未科進
士貴州正安知州敦厚子誦芬乾隆庚午科副榜旌德
教諭大椿子耿乾隆乙酉科舉人柱子卽禮部侍郎存
與侍講學士培因

大興金澍乾隆乙丑進士弟洪壬戌庶常溶潢溶皆舉
人邵楚帆總憲自昌乾隆戊戌庶常弟自華自悅自本

自和自巽自彭同胞六舉人一副貢

閩縣葉毅庵少詹觀國乾隆辛未翰林子申棻嘉慶戊
午舉人壬戌進士申藹乾隆乙卯舉人官江蘇知縣申
苞嘉慶戊午舉人申萬乾隆乙卯舉人乙丑翰林官至
高廉道申薌嘉慶甲子舉人已巳庶常官河南知府
吾吳邑張氏五子登科副都御史孟球康熙丁巳舉人
乙丑進士子學庠康熙己卯舉人已丑進士官工部郎
中應造辛卯舉人乙未進士官侍講學士紹賢己卯舉

人已丑進士官四川保甯府企齡戊子舉人官戶部員外郎景祁雍正癸卯舉人官廣西武宣令

太倉李蘅塘學士錫恭乾隆己酉拔貢乙卯舉人嘉慶丙辰翰林弟錫信癸卯舉人錫瓚己酉舉人錫惠錫晉嘉慶辛酉同榜舉人

錢塘許小范先生學范乾隆戊子舉人壬辰進士官刑部直隸司員外郎子乃來乾隆癸卯舉人官江蘇太倉州知州乃大嘉慶辛酉舉人官江南海州知州乃濟庚

申舉人已巳翰林官太常寺少卿乃毅道光辛巳舉人
官甘肅敦煌縣知縣乃普嘉慶丙子舉人庚辰榜眼官
兵部尙書乃釗道光戊子舉人乙未翰林今官侍讀乃
恩癸卯舉人七子登科海內所未有伯兄季弟先後同
年尤科目中所罕見

侯官廖封翁世有陰德子鴻翔嘉慶戊寅舉人鴻禧道
光乙酉舉人鴻苞嘉慶丁丑翰林官江蘇督糧同知鴻
藻己巳翰林官江西督糧道鴻荃己巳榜眼前工部尙

書

寶坻李東亭太守光先乾隆戊申舉人官江西贛州府
子藩癸酉舉人甲戌進士江西建昌府菡戊寅舉人道
光壬午翰林官副憲純戊寅舉人癸未翰林通政司副
使莊壬午舉人戊戌進士戶部主事薌己亥舉人

福州曾霽峯刺史暉春嘉慶戊午舉人辛酉進士子元
基道光乙未舉人元炳戊子舉人已丑進士元海嘉慶
戊寅舉人道光壬午進士元燮甲午舉人戊戌進士元

澄辛卯舉人孫兆鼇子庚子會試所得士聞伊先世戒殺已歷三百餘年蓋好生之報云

陽湖呂宮順治丁亥 恩科一甲一名進士官至太子

太保宏文院大學士孫瀛乾隆壬申 恩科舉人甲戌

進士會孫爾禧乾隆癸卯舉人元孫子班嘉慶庚申

恩科舉人壬戌進士生子五佺孫道光甲午舉人丙申

恩科進士翰林院編修佶孫乙未 恩科舉人份孫

庚子 恩科舉人信孫丁酉舉人戊戌進士翰林院編

修僕孫丙午舉人五世科甲又五子登科洵爲盛事

仁和蔡小霞方伯廷衡乾隆戊戌榜眼兄子毅堂都轉
共武乾隆辛丑翰林子磨洲太守振武道光丙申翰林
毅堂孫劬庵編修念慈道光辛丑翰林磨洲屬子書祖
孫父子叔姪兄弟翰林額因記于此

國初鄉會試分房不全用進士出身人員亦有兼用庶
吉士及知縣者順治丙戌會房兵科郝傑辛酉舉人丁
亥會房刑科梁維本辛酉舉人乙未會房兵部郎中楊

陸戊子舉人已亥會房富鴻業馬晉允吳珂鳴王吉人
郭諫王颺昌彭之鳳崔蔚林吳本植俱戊戌庶吉士辛
丑會房王遵訓田麟揚正中李天馥陳廷敬周訓成蘇
宣化翟世祺朱錦周之麟鍾朗金國用陳志紀盧乾元
趙之符趙濟美俱己亥庶吉士禮科姜希轍壬午舉人
康熙甲辰會房禮部主事俞有章乙未會副兵部主事
蔡兆豐辛丑會副癸丑會房兵科余司仁戊子舉人丁
巳鄉房王錫輔周之麟皆進士知縣黃燠彭孫適華章

志沈珩皆進士候選知縣戊辰會房兵科陳世安丁巳
舉人甲戌會房兵科趙心抃壬子舉人工科彭鵬庚子
舉人戊子鄉房工部主事歐陽方曜甲子舉人梁通洛
王家驥薛祖順陳守創李先立俱進士知縣

雍正癸卯鄉房鄭江夏力恕何朗侯來旌關上進晏斯
盛黃煥章吳棫俱辛丑庶吉士會房御史許容辛卯舉
人壬子鄉房陶正靖曹一士楊廷棟裘思錄皆庚戌庶
吉士

乾隆丙辰會房崔紀係祭酒汪由敦係四譯館少卿辛酉鄉試朱必坦壬子舉人甲子鄉房鍾鳳翔邵齊燾姚範孫廷槐凌鎬周孔從王鋌王康佐劉錫齡黃遇隆皆壬戌庶吉士庚辰會房錢大經庶吉士

乾隆甲午順天鄉試分校於例不開列人員內

特旨用京堂七員小京官四員宗人府府丞竇東臬先生光鼐太常卿吳香亭玉綸光祿卿吳澹人綬詔大理少卿周綏遠於禮太僕少卿曹孝如學閔通叅趙鹿泉

佑司業朱雨霖蔡元大理寺丞朱鈍叟衣黠江南拔貢
國子監助教吳稷堂省蘭江蘇舉人學正徐條甫立綱
乙酉順天舉人學正汪鹿園如藻己卯浙江舉人後汪
徐俱於乙未館選吳於戊戌

賜進士館選朱是時方檢點試具入場忽被

恩命衡文真奇遇也

按甲辰會房大理卿富
炎泰亦係例不開列者

嘉慶己未分校如章文簡相國師時官御史煦齋協揆
英和時官少詹方葆巖制軍維甸時官御史金蘭畦大

寇光第時官刑部郎中徐春帆府丞如澍時官御史蕭
崑田給諫芝汪東序侍御鏞七人俱未經考差而得分
校

道光癸未會房許魚南應藻庚辰庶常壬午散館授編
修邵丹畦甲名己卯庶常壬午補散館授編修戊戌會
房季仙九芝昌乙巳會房蔡劬庵念慈辛丑庶常甲辰
散館授編修戴醇士熙候補侍讀學士均未與考差而
得者

乾隆己丑會試禮部奏定於落卷內挑取中書學正分校各員例不得與胡文恪以庶子分校榜發出闈時方直上書房卽至圓明園跪

安奉

旨仍入闈閱中書學正卷爲房考未有之榮

乾隆壬午戴箕圃編修第元充江南副考官庚子可亭編修均元癸卯蓮士修撰衢亨丙午石士編修心亨父子兄弟先後典試江南丁酉箕圃給諫充湖北副考官

己亥蓮士修撰充正考官別父子先後典試湖北嘉慶
丁卯程鶴樵御史國仁充陝西正考官戊辰小鶴編修
家督充陝西副考官則父子先後典試陝西乾隆戊子
箕圃以御史任湖北學政丁未石士以編修任湖北學
政則父子先後視學湖北嘉慶己未吳烜以編修任江
西學政道光丁酉子其濬以閣學任江西學政則父子
先後視學江西戊戌箕圃以禮科任安徽學政乙卯可
亭以御史任安徽學政則兄弟先後視學安徽庚子吳

白華師以侍讀學士任湖北學政戊申吳稷堂先生省
蘭以中允任湖北學政則兄弟先後視學湖北己亥白
華師以學士充浙江副考官丙午稷堂先生以編修充
浙江正考官甲寅乙卯白華師以工部侍郎充浙江正
考官嘉慶戊午稷堂先生以工部侍郎充浙江正考官
則兄弟先後典試浙江至朱竹君筠乾隆己亥以編修
任福建學政庚子石君先生以侍讀來代白華師乾隆
庚戌以工部侍郎任順天學政辛亥稷堂先生以閣學

來代乙卯白華師復以工部侍郎代之兄弟接任尤爲
難得

國初各省督學御史提學道有不專用進士者如順治
六年江南督學御史李嵩陽前庚午舉人十七年湖北
督學道王自新乙酉舉人十八年湖廣通省提學道魏
學渠戊子舉人康熙三年浙江督學道李如桂奉天舉
人山東提學道王鑰河南貢生雲南提學道何起鵬奉
天舉人六年江西提學道吳煒順天舉人七年江南提

學道簡上四川舉人至如乾隆六十年和庵先生瑚圖
禮以候補四品卿得山西學政道光二十五年戴醇士
熙以候補侍讀學士得廣東學政亦前此所未有也

順天鄉試主考凡籍順天直隸者例應迴避乾隆癸卯
翁覃溪洗馬方綱道光壬辰白小山總憲鎔俱爲副考
官翁大興人白通州人典試本省亦屬僅有之事

部院堂司官例應迴避惟館閣則否予子曾瑩兄子遵
郝俱官編修子曾綬考補中書兄子希甫以中書在閣

行走均不迴避惟遇派差使請議敘避嫌弗與聞大教
習與庶常亦無迴避明文康熙癸丑崑山徐秉義以編
修初入館其弟立齋相國以掌院學士充教習具疏題
明

特旨免秉義教習道光庚子王省厓相國充教習其子
沆爲庶吉士大課卷一體評閱惟不列甲乙而已

道光乙巳會試楊簡侯宮贊能格與分校是科覆試第
一羅壽雁 殿試第一蕭錦忠 朝考第一孫鼎臣皆

出本房亦佳話也

八不_一度_二金_三七_四臣

三二

--	--	--	--	--	--	--	--	--	--

思補齋筆記卷六

吳縣 潘世恩 芝軒

文衡

嘉慶己未余分校禮闈於滿洲得一卷詩題鳴鳩拂其羽末聯云早知 溫室樹終待鳳鸞聲闈中決爲偉器呈薦列房首及填榜則覺羅桂芳也不數年由翰林躋卿貳入直 內廷衡文大省惜享年不永然身後加尙書銜

賜諡文敏曠典也

吾吳風俗往往以髫齡寄名外姓取其易養也予幼時每見篋中紅單書桂芳二字以問吾母黃夫人母曰汝四歲隨我至外家從母見而愛之因寄名焉從母適邱芷房太史此邱太公爲汝所取名也予謹識之及予分校已未禮闈房首之名適合則先幾之示已在二十年前亦可異矣是科予以侍講學士忝與分校得士十一人內如兩廣督盧敏肅坤漕督覺羅文敏桂芳張少宰

鱗吳中丞榮光蘇廉訪兆登皆出本房可謂一時之盛
羅世材號菊農湖北隨州孝廉十上公車未遇己未會
試年五十餘矣三場畢作別號詩云年年棄甲笑于思
皂帽青衫客又來三十三回燒樺燭可知蠟淚已成堆
詩極蘊藉是科出予本房成進士

阮芸臺相國元己未會試一榜得人最盛故小門生得
殿元者甚多予無以過之然如戊辰吳殿撰信中出香
東侍郎桂芳門下甲戌龍殿撰汝言出林敏齋觀察培

厚門下庚辰陳三元繼昌出孔夢鷗太守傳綸門下己
丑李殿撰振鈞出仰山侍郎鍾昌黃樹齋侍郎爵滋門
下乙未劉殿撰繹出張小軒侍郎鱗門下本房又係李
石梧制府星沅庚子李殿撰承霖出黃樹齋門下甲辰
孫殿撰毓漣鄉試出徐柳臣思莊門下會試出許雲生
編修振初門下乙巳蕭殿撰錦忠出楊簡侯官贊能格
門下丁未張殿撰之萬出陳琴山枚門下亦可謂盛矣
承霖之萬爲子庚子丁未所得士仍以師生稱至門生

之子又爲門生則如蘇樸園廉訪兆登爲予己未所得
士子敬衡丙申會試出予門甲子浙闈謝裕庵大令照
子榮埭丙申會試出予門戚蓉臺洗馬人鏡子貞己亥
庚子俱出予門吳蒼助大令增嘉子班己亥鄉試丁未
會試俱出予門吟濤通政穆馨阿戊辰鄉試所得士子
三壽己亥庚子俱出予門饒敷善江西拔貢子宗孟己
亥鄉試出予門陳九功雲南拔貢子秉鈞壬辰會試出
予門陳小坪刺史鼎雯壬辰會試所得士子鍾芳丁未

會試出予門兄弟俱出予門者如己未桂芳戊辰鄉試
桂萑戊辰鄉試瑞林錫旃壬辰會試惠林錫檀丙申會
試和淳庚子和潤壬辰瑞常趙霖丙申瑞慶趙楫丙申
湯雲林庚子湯雲松丙申伍濬祥丁未奎祥己亥蕭時
馨庚子時馥己亥張之京丁未之萬壬辰莊心省丁未
莊心庠丙申周沐潤周源緒同榜己亥舒樺慶樟鮑庠
鮑康吳台朗台壽焦祐灃祐瀛皆同榜庚子黃倬兆麟
同榜同入翰林阿克丹己亥所得士子福全丁未會試

同校出予門尤爲佳話

予視學雲南庚申秋蘇樸園典試來滇揭曉後率小門生蘇鼇等晉謁及予視學浙江丁卯秋吳荷屋榮光典試來浙揭曉後率小門生陳傳均等晉謁時光祿公就養在署親見門下門生可喜也

鄉會試糊名易書憑文取士惟選拔一途歷試詩文經古策論觀其人才察其言辭與古人身言書判之旨適相符合故每省入貢於都者策考覆試定以等差帶領

引

見內用京員外用縣令往往得人最盛惟定例十二年一舉行學使者每難再遇予雲南得辛酉拔貢生八十四名江西得癸酉拔貢生一百五名數十年間內而鼎甲翰林至侍郎外而撫司道府不可枚舉以此見國家取材之廣學使者亦與有榮施矣

學臣三年任滿將各學所舉優生彙考取中大省六人中省四人小省二人貢入成均屆期禮部奏請

欽命文詩題各一試之名曰優貢予於嘉慶辛酉雲南
任滿得臨安廖敦行昆明寇倫二人敦行戊辰館選倫
甲子孝廉丁卯浙江任滿得仁和方懋朝錢塘凌銓歸
安姚樟鄞縣趙存洵蕭山來學醇嘉善黃安濤是科安
濤中式易石門方廷瑚樟安濤俱己巳館選銓辛未館
選存洵己卯館選學醇庚辰館選懋朝廷瑚俱孝廉一
榜得五翰林可謂盛矣

予屢奉

恩命俾掌文衡凡典鄉試者三嘉慶甲子浙江得沈毓
瑛等九十四人戊辰順天得宗室瑞林等七人諸葛光
泰等二百三十七人道光己亥順天得宗室和潤等四
人沈際清等二百四十三人典會試者四道光壬辰得
宗室常祿等三人馬學易等二百三人丙申得宗室榮
棻等二人夏子齡等一百七十四人庚子得宗室秀平
等二人吳敬羲等一百八十三人丁未得宗室載鏗等
二人許彭壽等二百二十一人視學者三嘉慶己未以

詹事接任雲南學政累升禮部右侍郎任滿回京甲子
典試事竣以戶部左侍郎留浙江學政調吏部左侍郎
任滿回京庚午以吏部左侍郎任江西學政壬申十二
月升工部尙書回京庚子春偕雲章大司農隆文龔季
思大宗伯守正王藕塘少司農瑋慶同典會試闈中有
叨持玉尺已三三之句迭成七律五首同人屬和是秋
九月子會綬捷京兆試辛丑夏子會瑩館選得詩皆疊
用三字韻以紀之

道光壬辰予典春闈一甲三名吳崧甫少宗伯朱桐軒
少司馬季仙九少宰丁未科桐軒與予並爲總裁仙九
知貢舉及廷試三君俱與讀卷爲一時盛事因紀以
詩云霓裳會記領羣仙使節分馳會合難彈指光陰幾
鷓蟀同心臭味是芝蘭胸羅武庫今推杜手障文瀾夙
仰韓更喜春官舊桃李傳衣先向榜頭看吳崧甫和云
潞公矍鑠望如仙四掌冰衡自古難鶴立筍班皆國幹
燕詒藻鑑及階蘭傳衣故事慙和范點筆聯吟羨孟韓

鳳唼堂前翹首近，
銜材愧作局中看。
朱桐軒和云三朝
領袖闖蓬仙，
裴皞文名未足難。
廣座朋簪陪杖履，
東堂衡鑒出荃蘭。
蜂腰兄弟參三李，
燕翼門庭邁八韓。
十五年前一回首，
殊榮豈作等閒看。
季仙九和云四度珠衡
重選仙八旬，
朗鑑豈公難。
喜承湛露皆溫樹，
新被春風自上蘭。
同榜昔容參沆準，
傳衣今更勝王韓。
記從櫻筍厨開後，
千佛名經許早看。

余充 殿試讀卷者七嘉慶戊辰一甲三名吳信中謝

階樹石承藻甲戌龍汝言祝慶蕃伍長華道光己丑李
振鈞錢福昌朱蘭乙未劉繹曹聯桂喬晉芳戊戌鈕福
保金國均江國霖庚子李承霖馮桂芬張百揆甲辰孫
毓淮周學濬馮培元 朝考讀卷者八嘉慶戊辰第一
潘恭常己巳許乃濟甲戌祝慶揚道光己丑易長楨癸
巳朱憲會乙未葉琚丙申徐士毅戊戌丁嘉葆閱覆試
卷者七嘉慶壬戌戊辰甲戌道光己丑乙未戊戌庚子
閱鄉試覆試卷者二道光乙未丁酉閱庶吉士散館卷

者二嘉慶甲戌道光辛丑闕考差卷者十二嘉慶甲子
戊辰癸酉道光戊子辛卯壬辰甲午乙未丁酉己亥庚
子甲辰闕大考卷者一道光癸巳闕拔貢 朝考覆試
卷者一道光戊戌八旗一等恒泰等三名二等徐桐等
二名奉天一等韓秉權二等柳培盛直隸一等李廷楫
等五名二等焦有霖等十二名江蘇一等蔣錫綬等五
名二等韓掄元等九名安徽一等孫觀等五名二等吳
璪等五名江西一等勒人璧等五名二等謝煌等八名

浙江一等慎毓林等五名二等朱泰修等十名福建一
等章漢等四名二等陳景會等六名湖北一等許本銓
等三名二等姜熊等六名湖南一等文嶽英等四名二
等羅佩舒等六名河南一等段晴川等五名二等劉元
吉等五名山東一等陳介眉等二名二等畢承昭等十
二名山西一等李萬春等三名二等康錫齡等六名陝
西一等楊振鷺等三名二等許岢等五名甘肅一等馬
玉二等李協中等四名四川一等張崇本等四名二等

姚學海等八名廣東一等陳綸韜等三名二等梁巍等
 六名廣西一等李舒翹等三名二等蔣翊謙等四名雲
 南一等李汝楫等三名二等王佩璜等四名貴州一等
 張仁政等二名二等李文燿等三名嘉慶癸亥考試膳
 錄得李振鏞等二百人道光戊子充順天武鄉試考官
 得崔繩庵等百六十四人以同為文字之役故類誌之
 乾隆癸丑會試予出章文簡公門下嘉慶己未予與文
 簡師同與分校居會經堂之西廂房師指謂予曰此即

思補齋集記

七

予癸丑年所居也同人歎羨以爲佳話

嘉慶戊辰主京兆試門生王春煦任萬與分校道光壬辰典禮闈門生黃樹齋爵滋與分校丙申典禮闈門生許吉齋乃安張薇階星燦與分校己亥主京兆試門生楊簡侯能格張星白錫庚王怡士通昭賈運生臻與分校庚子典禮闈門生單地山懋謙汪艮山振基謝方齋榮埭蔡磨洲振武胡潤芝林翼潘木君鐸駱籲門秉章與分校是年闈中贈及門諸君詩有羣賢高會暮春三

七子吟成彩筆酣之句丁未典禮闈門生孔慶鋤敬和
方濬頤周秉鑑陳枚雷維翰匡源黃倬俱與分校

門下士得鄉會考官者嘉慶庚申雲南蘇兆登丁卯順
天桂芳浙江吳榮光庚午江南桂芳癸酉山東戚人鏡
廣西孔傳綸丙子四川孔傳綸貴州黃安濤戊寅福建
陳詩山東馬步蟾己卯湖南孔傳綸山西戚人鏡江西
張鱗道光辛巳廣東傅綬乙酉江西福申湖南石綸戊
子江南鍾昌黃爵滋江西王貽桂雲南瞿溶辛卯湖北

李儒郊山東徐思莊甲午福建吳鍾駿湖南許乃安四
川李星沅雲南汪振基乙未會試張鱗鄉試江南單懋
謙湖南吳鍾駿湖北周銘恩陝甘李儒郊廣東趙德潏
廣西賈臻雲南花沙納丁酉山東黃爵滋朱鳳標山西
何冠英陝甘蘇敬衡己亥江南黃爵滋江西季芝昌福
建何紹基湖北李汝嶠湖南邵燦河南勞崇光山西慧
成陝甘李方廣東潘鐸廣西阿彥達雲南和淳沈兆霖
貴州趙楫庚子江南胡林翼浙江何冠英福建慧成路

慎莊湖北勞崇光山東林鴻年陝甘張錫庚四川沈兆
 霖廣東楊能格高人鑑貴州蔡振武癸卯順天花沙納
 江南徐士毅江西匡源浙江楊能格湖北蕭時馥沈元
 泰湖南陳枚甘守先河南范承典山西莊受祺陝甘吳
 敬義四川趙楫廣東翁同書廣西李承霖鍾保甲辰福
 建瑞常湖北殷兆鏞河南厲恩官山東舒興阿山西匡
 源陝甘甘守先四川湯雲松廣西馮桂芬貴州萬青藜
 何紹基丙午浙江王景淳四川徐士毅湖北廉師敏廣

西鄒振杰丁未會試朱鳳標

鄉會試得分校者道光丙戌會試穆馨阿李儒郊戊子
鄉試朱達吉辛卯鄉試朱達吉壬辰會試黃爵滋鄉試
石綸癸巳會試朱達吉甲午鄉試善燾高人鑑蔡錦泉
嚴良訓石綸張星燦乙未會試戴熙單懋謙黃爵滋趙
德潏李星沅鄉試張星燦陳書會許乃安李方黃廷珍
徐思莊丙申會試張星燦陳書會許乃安丁酉鄉試趙
長齡李方戊戌會試單懋謙黃廷珍季芝昌己亥鄉試

張錫庚賈臻楊能格王通昭庚子會試謝榮埭汪振基
蔡振武單懋謙胡林翼潘鐸駱秉章鄉試張灃翰王通
昭陸應穀駱秉章辛丑會試桑春榮石綸趙楫和淳癸
卯鄉試馮桂芬厲恩官謝榮埭萬青藜黃兆麟金肇洛
瑞常王通昭甲辰會試蔣琦淳許振祜郭沛霖黃倬鄉
試姚福增蔣琦淳梁敬事顧嘉蘅鄭瓊詔沈元泰陳枚
邵綸雷維翰黃倬徐士毅周炳鑑乙巳會試蔣琦淳姚
福增敬和戴熙許振祜蕭時馥陳枚楊能格梁敬事李

道生徐士穀丙午鄉試車順軌史淳鄭瓊詔羅傳球毓
祿丁未會試方濬頤敬和孔慶鋤周炳鑑陳枚雷維翰
匡源黃倬

任各省學政者嘉慶丙子蘇兆登以戶部員外郎任陝
甘道光癸未張鱗以太常卿任安徽乙酉福申以大理
卿任江西辛卯張鱗以兵部左侍郎任福建甲午汪振
基以編修任山西李星沅以編修任廣東乙未蔡錦泉
以編修任湖南丙申吳鍾駿以修撰任福建戊戌戴熙

以中允補放廣東己亥朱鳳標以編修任湖北庚子季
芝昌以詹事任浙江李汝嶠以編修任山東單懋謙以
洗馬任廣東沈兆霖以編修任陝甘癸卯季芝昌以禮
部右侍郎任安徽吳鍾駿以內閣學士任浙江殷壽彭
以侍講學士任山東蔡振武以御史任四川李承霖以
修撰任廣西壬寅駱秉章以府丞任奉天乙巳戴熙以
候補侍講學士補放廣東丙午王祖培以編修任陝甘
梁同新以編修任湖南徐士穀以編修任四川丁未蕭

時馥以編修補放河南學政戊申翁同書以編修補放

貴州學政

思補齋筆記卷七

吳縣 潘世恩 芝軒

管聞

吾鄉彭南昀先生定求父雲客先生瓏順治丁酉舉人
康熙初官粵東長甯令有惠政嘗以公事忤大吏遭誣
去官禍幾不測南昀先生時爲諸生聞難急赴以穹窿
山施真人亮生道行高妙往求之齋沐執香徒步上山
至半嶺真人迎出曰君來意吾已知尊公可保無事宜

速往遂於除夕冒雪登程挾兩蒼頭走數千里攀嶺涉
瀧一月而抵長甯道逢真人還迎謂曰尊公事已解亟
往迎歸吾亦從此逝矣及至寓父子相向痛哭見者感
動逾年歸里究不知其何以得免也後至穹窿山訪真
人已他往不復得見甲寅春先生夢一神人示以榜有
丙辰會狀字謂曰上帝以汝有孝行特命預期宣示以
著獎勵且欲使世間知有感應耳先生果以丙辰舉禮
部及 廷試皆第一授修撰以侍講告歸孫芝庭先生

啟豐雍正丁未會狀官至兵部尙書子孫科第綿延至今鄉里榮之

韓慕廬先生爲諸生時館於婁門外一日天將明進城遇一童子聰俊異常與之談娓娓不倦欲去輒留之忽瞿然曰公誤我前村某家今日某時結親我花粉煞也今已過時公誤我矣言訖竟去公訪至前村則某家結親甫畢設宴待客留公飲因問吉期何人揀選首坐一人曰此某所選也公曰何以必用某時對曰亦知此時

犯花粉煞幸喜有文曲星解耳公聞之頗以自負後中
康熙癸丑會狀官至大宗伯諡文懿

會大父開齋公應浙江試甫入號舍忽見一婦人褰幃
欲入旋卻走曰我以為是楊三乃非耶公驚訝因諦視
卷面則三十二號三字模糊誤坐二十二號急遷去布
置粗畢因至號口候之須臾有一頎而長者喚本號號
軍公迎問曰君莫非楊姓乎曰然行三乎曰然君何以
知之告以故其人悵然曰我今歸矣不入號矣問何故

曰昔館鄉村主人以反目故欲出其妻屬寫休書一紙其妻歸自經死此後每入場輒來予告以出自汝夫意與我何尤答曰吾夫村人不識字不過一時之忿越宿則氣平一經落筆則無可挽回子豈得置身事外乎今此人又來我決計歸矣歎息而去公每以此戒子弟曰士子一言一行皆宜謹慎偶有過舉鬼神難欺若楊三者可以鑒矣

嘉慶甲子奉

命典試浙江謁別劉文清師師爲余言張文敏典試福建時封翁於中秋攜書畫泛舟西湖見一生避雨樹下招之登舟自言董姓試畢出闈遇雨暫憩公索觀試藝甚賞之問向來授徒乎曰然能至京乎曰固所願也公贈以三十金俾料理行裝文敏過浙攜至京邸董生天姿聰穎而又好學文敏所藏法書名畫一見輒能摹仿時文敏直南齋以筆墨求者無虛日生爲代作幾欲亂真人稱之曰董相公一日書賈得名人畫十二幅缺

其一生爲補之得重價於是向之求文敏者轉而求董相公不數年登甲榜改翰林入直南齋官至大宗伯卽文恪公也浙多佳士今必有文恪其人者得人報國在此行矣予謹識之文敏從孫詩船方伯祥河道光戊子典試福建予贈詩有前輩高風心仰止西湖韻事話從頭之句蓋謂此也

王文端公未第時館於山西某中丞幕府有王先生者紹興人精於占課幕中人敬信之公獨未之信也一日

有同事手握一鼠示之曰先生神算請決其死生對曰
不死曰此物死生在我我手斃之則子算爲無靈矣公
勸止之且爲乞得謂先生日子以此鼠不死盍斷其何
時當走曰今夜子初二刻公攜歸牀下有烟罐移烟他
處置鼠其中上壓以石意謂鼠無從走明日問之爲有
辭矣是日主人開宴與諸同事觀劇上燈後公覺神思
困倦辭歸書室靜坐數刻噉粥畢呼童取烟童於牀下
覓罐罐方啟有物突出公急止之已無及矣命取洋表

視之則子初二刻也公於是奇之秋間將歸應試意未
決請先生定行止先生占畢起賀手書一紙封固藏之
曰他日請驗公必欲得之不許正相持間主人至問何
事告之故主人曰如此我當代爲收之及歸就試榜發
中副車仍至館責先生曰何以誑我先生曰息壤在彼
可驗也因向主人索觀及拆封有中式副榜第八名七
字公益奇之庚辰秋試又問卜於先生曰今科正榜無
疑但似元非元得魁爲妙榜發中第七名是科解元則

雷爾杰也辛巳春至京會試甫下車先生亦至問中式
名次甚喜因令占會試若何曰斷不可得會元如中第
十名則大魁可必從此前程遠大福壽無量公曰我年
非少壯得一京職已爲萬幸敢妄想耶先生曰此理數
自然不可強也是年公會試中式第十名 廷試第一
官至東閣大學士省厓同年相國爲予言之

紀文達師嘗爲予言初典山西鄉試得一卷甚爲欣賞
意欲掄元同事者以元卷已定置之第二先生曰若置

第二不如留作下次解元遂抑之歸以告姚安公公手批其頰曰汝少年幸得科第視他人功名直如兒戲第一第二相去幾何再遲三年安知其別無事故耶先生聞庭訓深以爲悔及至下科此生竟得發解先生曰此偶然事耳衡文者終當以姚安公之言爲正

劉文清師嘗與協揆勤僖公琳甯同在朝房勤僖曰公學問品行文章書法皆爲海內欽仰究以何者爲第一師應曰餽餽第一聞者皆笑師蓋隱寓謙遜之意云又

一日子得董文敏臨天賜帖一冊請師評定師曰此的真董書當急購之毋爲他人有也勤僖曰公何以知之師曰譬如巨木以問匠頭無不知者僕乃書家之匠頭耳此雖戲語實確論也

戊辰在京兆闈中衡文之暇相與譚論往事曹文正語予曰稽文恭嘗自言生平一無善行仰荷

國恩遽躋高位不解所由惟記年十五六時隨侍太夫人臥榻夜分起至院中小遺有一婢臥房外榻上露半

體以手招之心頗動欲就之忽轉念有傷陰騭亟趨入
戶上牀猶怦怦也太夫人問故以實告太夫人曰此關
人名節斷不可出諸口明日卽喚其母來告以汝女吾
所愛但年已長成須爲擇配雖未滿年身價不須償也
母女感激拜謝而去或是此一節便爲陰德耶予謂一
念轉移正是理欲關頭以此見公識力之定已在少年
而太夫人不動聲色力爲保全尤不可及也

韓桂齡尙書對年八歲塾師以校人烹之反命曰七字

命題公戲作一破云小人之貪也以口小人之詐也亦以口師大加賞異謂封公樂餘先生曰此老吏斷獄手將來必掌刑名後以乾隆丁酉選拔觀政比部歷任封圻入爲大司寇精於律法中正和平爲秋官之最

乾隆甲辰臚唱前一日新進士俱在 乾清門外祇候

臨川楊邁公先生護素精風鑑徧視諸同年因謂仲父

畏堂公曰今科榜眼探花當是南北二邵

餘姚邵瑤 瑯琊天津邵朗

巖玉 清 第一人不見何也忽見一人脫帽箕踞坐金缸旁

則會稽茹古香菜也公指以示人曰卽此是矣少頃傳
十卷引

見以次唱名一一皆如公言

邁公先生官比部日本司有某旗控案公與同列悉心
審理判斷公允同列欲待原告到案方結公曰衆証已
確兩造具服何必令寡婦人拋頭露面至公堂乎案遂
結歲暮有一老僕持錢券至門曰奉主母命因公主議
免其到案以此爲謝公卻之僕人求面見叩頭曰主母

待下嚴如拒而不納不敢復命伏乞賜收公親至內堂
抱小兒出指以語僕曰吾年將四旬甫得一子若受此
惠小兒必至夭折僕不得已持券去後公受知

仁廟特擢郡守厯官至浙江巡撫

宮保尙書李書年前輩奕疇乾隆庚子翰林陳臬安徽
時有霍山縣民某以事至婦翁家留宿是日與婦共食
適有人從門外招之出數日不反跡之不得其父至婦
家詰訊以實告疑有別情鳴諸官縣令亦疑之拘其婦

嚴刑拷訊遂誣認與僱工人有奸同謀斃命獄成亟請於公求速結公曰人命至重天道難欺今屍身未獲案情未確而欲草率了事於心安乎案懸未結逾年其夫歸言是日正食時其友招之出問曰有貨物一挑從某至某可得百錢汝願行乎曰可自是每日以此爲業頗有贏餘近始歸里急投縣供明事遂得釋向從縣令言則兩人同抱不白之冤於地下矣公時年六旬尙未有子嗣後連舉六男長子銘皖子庚子會試所得士今春

公九十壽銘皖乞假歸祝還京來謁言公康健如壯盛
時蓋陰德之報云書之以告世之司刑者

乾隆庚戌會試朱文正爲正考官浙江中卷擬定二十
四本及奉到

欽定中額浙江七名每去一卷輒爲惋惜時同考王侍
御紫宇先生春煦得一卷甚喜亟爲補薦公問何省曰
浙江公曰浙江須去十七本一時頗難割愛庸可添乎
日本房見此佳卷不能不薦非敢望中欲求欣賞耳公

曰如此則留備欣賞可也次日請紫宇先生上堂謂曰
昨薦之卷非特十七卷中無此佳作卽所留七卷亦未
有能勝之者因將已刻卷削板易之及填榜則戴簡恪
公敦元也

申文恪公啟賢壬戌會試前一日至貢院照牆觀點名
牌適有人先至指公名踴躍歡喜曰得之矣公問以故
曰君得無卽牌上人乎曰然其人益喜曰尋君十年不
謂今日相見因詢公寓址曰明日奉訪公心訝之未及

問其姓名也次日早起闈人持名帖來曰有一本家求見視之乃宗弟申啟鏞正躊躇間已登堂矣審視卽昨日觀名牌者相與握手交拜畢告公曰十年前曾夢神人示以欲登甲科須待某人同榜數年來每至京會試徧訪各會館並無公名今忽於點名牌見之又得遇君同榜定矣言訖大笑相與訂交而去是年兩人果同中進士公得翰林啟鏞歸班銓選人謂夢由心生故有應有不應其偶應者亦不過依稀想像未有若此之靈異

者也此事文恪爲予言之

文恪又言幼時能言其前生鄉里姓氏家世鑿鑿可考
尊長斥其誕妄始不敢言而心頗了了及出痘後漸亦
忘之惟記山右人耳後官山西巡撫終於官署豈輪迴
之說果有之與跡其兩世與山右有緣亦可異矣

鶴舫相國自言五歲時出天花痘已發出而本原過虛
化毒無力不能開口飲食者十日矣至十一日氣息奄
奄垂絕因置之地會有道人至門求見太公閻人曰今

日正有事豈能見汝道人問故以實告道人曰吾此來
正欲救汝公子何拒爲不得已入告太公迎之進卽令
看視道人曰無妨可先抱起置牀上吾能治之顧左右
曰此地有清靜別院乎曰旁有佛堂三間更無人到道
人曰可矣但門須扃鎖三日後聞吾言方可開公曰諾
道人入室閉目靜坐夜分相國醒索飲以乳汁置銀管
注口中灌之第二日卽能走三日道人開門出己大愈
矣舉家驚喜呼爲神仙酬以銀幣辭不受太夫人手製

道袍以贈留數日去謂相國曰吾與汝有夙緣後三十年當來看汝至今五十餘年竟不再來相國曰彼時記道人白姓忘其名年約四十缺脣有鬚身穿衲襖手持鐵杖帶有煙管火鏹皆鐵爲之子然一身並無行李其形狀至今尙可想像究不知其何許人也

同年吳山尊學士計偕入都淑配孫夫人贈詩曰小語臨歧記可真回頭仍怕阿兄嗔看花遲早尋常事莫作蓬萊第二人夫人蓋丁未榜眼淵如方伯之女弟也用

筆可謂敏妙山尊以畫卷屬題因得見之惜未窺其全
壁也

嘉慶甲戌香東侍郎以漕帥奉

使湖北鞠案是年四月二十日子偕曹文正在 朝房

聽 宣文正謂予曰昨夢香東神色沮喪自言昔祖父
皆歿於楚今吾又至楚吾不歸矣言訖淚下慰勸再三
香東欲邀往理安寺心覺其異不肯往寤後思之殆非
佳兆子曰此夢耳豈有是耶適予與董文恭師同

派殿試讀卷談及香東文恭師曰大是異事昨閱香東所奏竟如遺摺先述祖父俱歿於楚次及伊病甚危篤後云近得某藥稍愈云云與文正之夢暗合予心訝其不祥越日而遺摺至其弟杏農桂菖於道光辛卯觀察浙中予贈詩有試向理安徽舊夢仙蹤倘與白雲還之句庚子秋杏農歿於浙東竟成詩讖矣

長沙彭太史舒萼先世遷自金陵道光己丑館選後請假歸里因至白下訪遠祖墓歲久土人無知者往來郊

野徘徊不能去有一老人怪而問之告以故老人曰此地舊有彭姓墓年遠乏人祭掃墓碣已陷土中得無是與太史亟召匠掘地出碣視之果其遠祖墓也回視老人已不復見孫寄圃制府爲文記之遂勒碑墓旁祭掃而歸竊喜此行不虛是殆孝思所感冥冥中有默導之者耶尤可喜者太史出守永昌其郡居民明初由南京移駐至今猶操土音五馬所臨如親桑梓抑何與金陵有夙緣也

思補齋筆記卷八

吳縣 潘世恩 芝軒

易名

國朝文臣諡法惟大學士及翰林授職之員始得冠以文字

歷朝以來尤重文正每遇禮部奏請奉

旨予諡者由閣臣撰擬四字恭候

欽定惟文正則不敢擬皆奉

特旨遵行茲所載悉遵會典次序

文忠 大學士傅恒

文誠 大學士富俊

文成 贈大學士達海 額爾德尼 大學士阿桂

文毅 大學士甯完我 巡撫馬雄鎮 大學士馮溥

魏裔介 贈尙書那彥成 總督陶澍

文恭 大學士王頊齡 富甯安 尙書勵廷儀 大

學士邁柱 協辦大學士三泰 尙書秦蕙田 大

學士陳宏謀 程景伊 左都加尙書周煌 大學

士嵇璜 左都觀保 大學士蔡新 董誥 尙書

劉瓌之 陸以莊

文敬 大學士三寶 文孚

文莊 大學士梁詩正 尙書王際華 德保 大學

士寶興

文端 大學士高爾儼 蔣赫德 車克對 哈納

杜立德 伊桑阿 吳璵 熊賜履 左都揆敘

大學士張鵬翮 尙書顧八代 大學士田從典

張英 朱軾 鄂爾泰 福敏 尙書汪由敦 大

學士來保 尹繼善 侍郎加尙書錢陳羣 大學

士伍彌泰 王杰 保甯 戴衢亨 協辦大學士

汪廷珍

文恪 大學士額色黑 詹事加侍郎沈荃 大學士

宋德宜 巴泰 尙書圖納 贈尙書勵杜訥 侍

郎高士奇 大學士高其位 尙書吳士玉 大學

士尹泰 協辦大學士劉於義 大學士蔣溥 尙

書董邦達 左都加尙書張泰開 尙書鍾音 曹

秀先 沈初 左都胡高望 贈尙書萬承風 大

學士慶桂 劉權之 總督董教增 趙慎畛 巡

撫申啟賢 大學士王鼎 將軍前尙書鐵麟

文穆 大學士馬齊 徐本 左都梅穀成

文安 尙書王鐸 大學士張端 尙書何凌漢

文良 尙書高其倬 贈尙書胡煦

文康 大學士宋權

文和 尙書陳斆永 大學士張允隨 張廷玉

文正 尙書湯斌 大學士劉統勳 朱珪 曹振鏞

文肅 大學士范文程 蔣廷錫 總督原任協辦大

學士陳大受 尙書王安國 大學士英廉 盧蔭

溥 尙書恩桂

文簡 大學士希福 溫達 尙書吳襄 大學士陳

元龍 尙書魏廷珍 王士禎 金士松 大學士

章煦 尙書王引之

文靖 大學士王熙 孫士毅 總督孫爾準

文清 大學士衛周祚 巡撫格爾古德 大學士阿

蘭泰 劉墉 原任大學士贈侍郎松筠

文懋 侍郎加尙書沈德潛 贈禮部尙書秦承業

文僖 大學士伊圖 黃機 吳正治 尙書王懿修

姚文田

文貞 尙書王崇簡 大學士張玉書 陳廷敬 李

光地

文慎 大學士伯麟

文定 大學士孫廷銓 李天馥 原任協辦大學士

徐元夢 尙書楊名時 協辦大學士孫嘉淦 原

任大學士高斌 大學士劉綸 梁國治 托津

尙書朱士彥

文勤 大學士李蔚 贈尙書蔡世遠 協辦大學士

阿克敦 總督鶴年 大學士陳世倌 高晉 協

辦大學士永貴 贈尙書奉寬 協辦大學士書麟

彭元瑞

文襄 大學士洪承疇 圖海 河督靳輔 大學士

李之芳 總督華顯 大學士黃廷桂 協辦大學

士兆惠 大學士舒赫德 于敏中 福康安 勒

保 明亮 長齡

文敏 大學士馮銓 贈尙書拉薩禮 侍郎加尙書

葉方藹 尙書郭四海 張大有 大學士稽曾筠

尙書楊超會 張照 贈尙書錢維城 尙書曹

文埴 加尙書桂芳 總督百齡 將軍原任協辦

大學士伊里布

交通 左都原任大學士王永吉 大學士金之俊

文達 尙書裘日修 協辦大學士紀昀

文懿 尙書韓奕其將軍而諡文者如果齊斯歡之諡

文僖玉麟之諡文恭鐵麟之諡文恪皆由翰林出身至

康熙六年領侍衛內大臣一等公索尼

予諡文忠蓋

特恩也

文臣諡法不用文字者禮部奏准

予諡後閣臣撰擬八字恭請

欽定

忠毅 總督孟喬芳 巡撫加尙書傅宏烈 巡道副

使贈侍郎陳啟泰 僉事贈侍郎陳丹赤

忠義 承政圖爾格

忠貞 總督范承謨

忠敏 巡撫贈尙書李日芑 尙書馬爾賽 大學士

莫洛

忠襄 尙書陳泰 總督李率泰 尙書卓羅

忠勇 總督額倫特

忠勤 總督張存仁 學士馬魯 侍郎科爾坤

忠靖 總督馬光輝

忠武 總督楊遇春

忠壯 總督和琳

忠果 總督甘文焜

忠烈 運使加尙書高天爵

忠節 參議贈侍郎葉映榴

端恪 尙書姚文然 左都贈尙書沈近思

端毅 尙書龔鼎孳 隆文

端肅 總督田文鏡

端敏 尙書劉棻

端勤

巡撫劉秉權

尙書德明

端簡

尙書王宏祚

荆山

侍郎贈尙書何世琪

端慤

侍郎宋文運

敬敏

承政滿達爾漢

總督阿林保

敬僖

尙書永慶

博啟圖

敬慎

侍郎熙昌

誠毅

尙書託庸

誠恪

總督薩載

誠武 尙書豐伸額

正直 尙書沙機達喇

清端 總督于成龍 傅臘塔 尙書孫徵灝 總督

殷泰 巡撫贈尙書陳瓚 總督楊宗仁

清恪 巡撫馬祐 尙書陳詵 張伯行 馬慧裕

清獻 總督趙廷臣 巡撫加尙書袁懋功 漕督徐

旭齡

清義 大學士謝陞

清惠 巡撫加尙書金世德 總督施維翰

清懋 尙書劉吳龍 總督袁守侗

莊恪 尙書甘汝來 總督喀爾吉善 河督白鍾山

左都阿思哈 巡撫朱桂楨

莊敏 總督桂林 尙書胡季堂

恭定 尙書郝維訥 閻循琦 侍郎加尙書吳紹詩

恭毅 尙書趙申喬 巡撫贈尙書李湖 總督原任

大學士李侍堯

恭憲 贈右承政孫昌齡

恭恪 尙書錢以愷 漕督瑚寶 總督富明安 尙

書富銳 侍郎豐伸濟倫 總督祁項

恭勤 尙書馬爾漢 總督碩色 尙書李世傑 布

彥達賚 總督表行簡 尙書那清安 河督栗毓

美

恭惠 河督何燭

恭慎 巡撫贈總督和舜武

恭簡 尙書性桂 常青

恭懋 總督圖思德 衍聖公孔毓圻

恪恭 右宗人登塞

恪勤 總督郭璞 河督陳鵬年 總督那蘇圖 侍

郎三和 尙書綽克託 德明 總督琅玕

恪敏 總督卞三元 方觀承 永寶

恪靖 巡撫贈尙書胡寶琮 總督鄂輝

恪慎 尙書成德 將軍前侍郎桂輪

恪僖 右宗人拔都海 左宗人喇世塔 左都舒常

恪簡 尙書劉峩

恪思 左宗正魯賓

襄忠 總督趙良棟

襄恪 總督常明

襄敏 右宗正吳達海 尙書葉赫 朱瑪喇 總督

蔡士英 右宗人瓦山

襄勤 河督于成龍 黎世序 漕督傅顯

襄壯 承政宜蓀 協辦大學士阿里袞

襄愍 大學士蘇納海

勤毅 總督胡全才 巡撫海甯 總督吳達善

勤直 尙書昇寅

勤恪 巡撫納齊喀 尙書朱綱 河督齊蘇勒 左

都楊汝毅 尙書海望 李元亮 總督海明 鄭

大進 尙書福隆安 金簡 張若淳

勤肅 總督鄂弼 尙書新柱 德福

勤襄 承政佟圖賴 總督李國英 巡撫杭愛 總

督惠齡 總督方維甸

勤勇 侍郎蘇魯邁

勤敏 承政阿拜 尙書甯古里 黃鉞

勤僖 總督馬之先 尙書劉昌 巡撫白色純 佟

鳳采 協辦大學士鄂彌達 巡撫加總督汪新

協辦大學士琳甯

勤果 侍郎徐大貴

勤愍 總督朱昌祚

勤懋 侍郎尼堪 漕督楊錫紱 尙書楊廷璋 恭

阿拉

敏達 總督李衛

敏恪 尙書鄂爾多 趙宏燦 左宗人裕綬

敏肅 總督盧坤

敏襄 尙書顧爾布錫 星內

敏惠 巡撫潘思渠

敏慤 巡撫王維珍

敏壯 承政巴篤里 尙書噶達渾 大學士巴哈納

敏勇 左都覺善

敏果 尙書明安達理 米思翰 魏象樞

肅敏 巡撫加總督趙宏燮

安恪 左承政房可壯

純和 左宗正托克托慧

明敏 侍郎碩詹

康靖 巡撫加尙書劉武元

康僖 侍郎贈右承政梁雲構 侍郎陳逢泰

敦敏 左宗人訥圖

温恪 右宗正準塔

温僖 河督孔毓珣 右宗人瑟爾臣

温勤 總督郎廷極

僖敬 巡撫加尙書周文華 侍郎席達禮

僖恪 侍郎庫禮

僖靖 巡撫祝世昌 左承政徐起元

僖敏 尙書謝啟元

僖和 尙書張秉貞

僖平 尙書李際期

簡敬 總督程祖洛

簡恪 尙書戴敦元

簡勤 尙書和瑛

懋敬 總督張師載

懋厚 右宗人穆臣

懋勤 總督蘇昌

懋愍 巡撫加尙書王登聯

昭簡 尙書歸宣光

武毅 尙書納穆札爾

剛烈 尙書鄂容安

果毅 左都鄂羅塞臣 熱河都統前總督瑚松額

果勇 侍郎三泰

義烈 尙書班第

壯果 左都拉布敦

壯敏 尙書喀蘭圖

靖節 總督裕謙

果壯 參政超哈爾

勇肅 尙書穆克登布

勇壯 署尙書季什哈至陸隴其以御史贈閣學諡清

獻乃我

國家獎勵清廉敦崇實學之至意若馬玠以知縣贈布
政使參議 忠勤強克捷以知縣贈知府諡忠烈劉欽
鄰以知縣贈太僕少卿諡忠節楊延亮以知縣諡昭節
方振聲以縣丞諡果勇則又

聖朝嘉惠死事諸臣不遺微末信乎易名之典超越前
古矣

會文齋鄭家
刻字鋪鐫刊